

經

大寶積經

一百之

六

|      |
|------|
| C40  |
| 4514 |
| 27   |



C40-4514

了翁上座請大藏及有  
家書異之武州紫雲山  
我微笑瑤院直府中永  
為學者不敢許出院內  
當山二世鐵牛機謹誌



B 64853

大寶積經卷第一百

唐三藏法師菩提流志奉詔譯

功德寶華敷菩薩會第三十四

如是我聞一時佛在王舍城耆闍崛山與大比丘眾  
千二百五十人俱復有無量諸菩薩眾爾時會中有  
菩薩名開敷功德寶華即從座起偏袒右肩右膝著  
地合掌向佛而作是言世尊我於如來欲有諮問惟  
願哀愍見垂聽許佛告功德華菩薩言善男子恣汝  
所問當為汝說爾時功德華菩薩白佛言世尊十方  
世界頗有現在諸佛如來若善男子善女人等受持

名號速能證得阿耨多羅三藐三菩提不佛言善哉  
善哉功德華汝今爲欲利益安樂天人世間及未來  
世諸菩薩等問於如來如是之義諦聽諦聽善思念  
之當爲汝說功德華言唯然世尊願樂欲聞爾時佛  
告功德華菩薩言善男子東方有世界名一切法功  
德莊嚴劫名普集一切利益彼現有佛號無量功德  
寶莊嚴威德王如來壽命無數其佛衆會無量無邊  
皆是清淨諸大菩薩若有淨信善男子善女人受持  
彼佛名者卽能滅除六十千劫生死之罪轉身得隨  
羅尼名爲樂說無礙凡所說法常爲十俱胝刹諸佛

世尊授以辯才令得無畏爾時世尊而說偈言

若人受持彼佛名

當獲如是諸功德

亦能成就餘勝法

速證無上佛菩提

復次功德華南方有世界名功德寶莊嚴劫名廣大  
功德彼現有佛號功德寶勝莊嚴威德王如來若有  
淨信善男子善女人受持彼佛名者轉身當得日輪  
光明徧照三昧於諸佛刹隨願往生亦當攝受無量  
功德莊嚴佛土生彼刹已具三十二相獲無礙辯才  
轉身當得阿耨多羅三藐三菩提爾時世尊而說偈

言

若人受持彼佛名 轉身當得難思定

三十二相以莊嚴 一生當證菩提果

復次功德華西方有世界名離一切憂闇劫名能勝  
王彼現有佛號一切法殊勝辯才莊嚴如來若有淨  
信善男子善女人受持彼佛名者毒不能害刀不能  
傷火不能燒水不能溺捨此身已當受化生獲陀羅  
尼名為百旋爾時世尊而說偈言

若人受持彼佛名 水火刀毒無能害

轉身當受化生報 成就百旋陀羅尼

復次功德華北方有世界名離塵闇劫名持大名稱

彼現有佛號積集無量辯才智慧如來若有淨信善  
男子善女人受持彼佛名者則為奉事六十俱胝那  
由他佛得徧一切處陀羅尼無盡藏陀羅尼乃至未  
成無上菩提終不更入三惡趣中常得往生諸佛刹  
土修菩薩行度脫無量惡趣衆生當於阿耨多羅三  
藐三菩提得不退轉爾時世尊而說偈言

若人受持彼佛名 所獲功德無有邊

決定當得陀羅尼 成就無上菩提果

復次功德華東南方有世界名勝妙莊嚴劫名出生  
功德彼現有佛號千雲雷吼聲王如來若有淨信善

男子善女人受持彼佛名者轉身得佛四無所畏四  
種神足大慈大悲十八不共法所得國土功德莊嚴  
亦如西方極樂世界無有異也若有女人能受持者  
皆悉轉爲丈夫之身爾時世尊而說偈言

若人受持彼佛名

獲不思議勝功德

彼常見於無量佛

女人當得丈夫身

復次功德華西南方有世界名無量莊嚴劫名能生  
妙法彼現有佛號最上妙色殊勝光明如來若有淨  
信善男子善女人受持彼佛名者則爲奉事九十俱  
胝諸佛如來得度脫一切衆生三昧何故名爲度脫

一切衆生三昧若善男子善女人依此三昧演說法  
時能令三千大千世界之中惡趣衆生悉皆解脫得  
生人天普獲安樂決定當得阿耨多羅三藐三菩提  
猶如悅意如來剎中所有衆生常受安樂爾時世尊  
而說偈言

若人受持彼佛名

所生常具大威德

諸根色力皆殊勝

智慧無邊無所著

復次功德華西北方有世界名爲離垢劫名廣族彼  
現有佛號種種勝光明威德王如來若有淨信善男  
子善女人受持彼佛名者轉身得無量辯才莊嚴陀

羅尼悉能受持八十俱胝如來所說之法所得國土功德莊嚴亦如西方極樂世界無有異也爾時世尊而說偈言

若人受持彼佛名

國土猶如無量壽

成就甚深諸法智

一生當證佛菩提

復次功德華東北方有世界名曰無憂劫名辯才莊嚴彼現有佛號無數劫積集菩提如來若有淨信善男子善女人受持彼佛名者卽爲供養八十俱胝諸佛世尊轉身具足六十種言音辯才爾時世尊而說偈言

若人受持彼佛名

智慧無邊到彼岸

如供八十俱胝佛

轉生當證妙辯才

復次功德華上方有世界名無量功德莊嚴威德劫名無量吼聲彼現有佛號虛空吼聲淨妙莊嚴光明照如來若有淨信善男子善女人受持彼佛名者所生之處種族尊豪識性聰慧善能通達世俗文詞凡所發言人皆信受於諸地中具足清淨戒定智慧解脫解脫知見獲宿命智得五神通亦當得佛十八不共速成阿耨多羅三藐三菩提爾時世尊而說偈言

若人受持彼佛名  
所生未曾離諸佛

具足八種梵音聲 速證無上菩提果

復次功德華下方有世界各種種音聲劫名積集智  
慧彼現有佛號一切法門神變威德光明照耀如來  
若有淨信善男子善女人受持彼佛名者轉身得陀  
羅尼名成就正覺當能受持九十俱胝諸佛如來所  
說之法一生當得阿耨多羅三藐三菩提爾時世尊  
而說偈言

若人受持彼佛名 得成正覺陀羅尼

受持無量諸佛法 一生當證大菩提

爾時開敷功德寶華菩薩及一切功德辯才音菩薩  
得陀羅尼門八萬俱胝菩薩皆悉趣向無上菩提得  
不退轉三那由他諸天及人發阿耨多羅三藐三菩  
提心佛說此經已功德華菩薩及一切世間天人阿  
脩羅乾闥婆等聞佛所說皆大歡喜信受奉行

善德天子會第三十五

如是我聞一時佛在舍衛國祇樹給孤獨園與大比  
丘衆一千人俱菩薩摩訶薩十千人并欲色界諸天  
子等是時文殊師利菩薩摩訶薩與善德天子俱在  
會中爾時世尊告文殊師利汝當爲此諸天大衆及  
諸菩薩演說諸佛甚深境界文殊師利白佛言唯然

世尊若善男子善女人欲知佛境界者當知非眼耳鼻舌身意境界非色聲香味觸法境界世尊非境界是佛境界以是義故如佛所得阿耨多羅三藐三菩提爲何境界耶佛言空境界諸見平等故無相境界一切相平等故無願境界三界平等故無作境界有作平等故無爲境界有爲平等故文殊師利言世尊何等是無爲境界佛言無念是無爲境界文殊師利言世尊若無爲等是佛境界爲無念者依何而說無所依故則無所說無所說故則不可說世尊諸佛境界不可說也佛言文殊師利佛境界當於何求曰於

一切衆生煩惱中求何以故衆生煩惱性不可得非聲聞緣覺之所能知是則名爲諸佛境界佛言文殊師利佛境界有增減耶曰無增減也佛言云何了知一切衆生煩惱本性曰如佛境界無有增減煩惱本性亦無增減佛言云何名爲煩惱本性曰煩惱本性是佛界本性世尊若煩惱性異佛境界則不說佛住一切法平等性中以煩惱性卽佛界性故說如來住平等性又問汝見如來住何等曰如我所解衆生現行貪瞋癡者所住平等爲如來住佛言衆生現行三毒煩惱住何等答曰住空無相無願平等性中

佛言文殊彼性空中云何復有貪瞋癡耶文殊師利  
言於彼有中。有性空處。有貪瞋癡。佛言於何有中說  
有性空。曰於文字語言中說。有性空。有性空。故有貪  
瞋癡。如佛所說。諸比丘。有無生。無爲。無作。無起。若無  
生。無爲。無作。無起。不有者。亦不可說。有生。有爲。有作  
有起。是故此比丘。以有無生。及無所起。由此得說。有生  
有起。如是世尊。若無性空。無相。願則不可說。貪瞋癡  
等一切。諸見。佛言文殊師利。以是義。故如汝所說。住  
煩惱者。是住性空。文殊師利言。世尊。若觀行者。離於  
煩惱。而求性空。則不相應。云何別有性空。異於煩惱  
若觀煩惱。卽是性空。爲正修行。佛言文殊師利。汝住  
煩惱。離煩惱。耶文殊師利言。所有煩惱。悉皆平等。如  
是平等。我正修行。入此平等。則不離煩惱。不住煩惱。  
若沙門婆羅門。自謂離欲。見他煩惱。彼隨二見。云何  
二見。謂有煩惱。名爲常見。謂無煩惱。名爲斷見。世尊  
正修行者。不見自他。有無之相。何以故。明了一切法  
故。佛言文殊師利。依何正修行。曰正修行者。爲無所  
依。佛言不依於道。而修行。耶曰若有所依。而修行者  
則是有爲。若行有爲。則非平等。所以者何。不離生住  
壞。故佛言文殊師利。無爲中。頗有數耶。文殊師利言

世尊若無爲有數卽是有爲非謂無爲佛言若聖者得證無爲則有此法寧無數耶曰法無數故聖遠離數爲無數也佛言文殊汝證聖法爲不證耶文殊師利言世尊若問化人汝證聖法爲不證者彼云何答佛言文殊夫化人者則不可說有證非證文殊師利言佛豈不說一切諸法皆如化耶佛言如是如是曰若一切法皆如化者云何問言汝證聖法爲不證也佛言文殊汝於三乘證何平等曰佛界平等我如是證佛言汝得佛境界耶曰若世尊得者我亦當得爾時尊者須菩提語文殊師利言如來不得佛境界耶文殊師利言汝於聲聞境界有所得耶須菩提言聖者解脫非得非得曰如是如是如來解脫亦非有境界非無境界須菩提言文殊師利汝不將護新發意菩薩而演說法文殊師利言須菩提於意云何若有醫人將護病者不與辛酸苦澀等藥而彼醫人於彼病者爲與其差爲與死耶須菩提言是與死苦非施安樂文殊師利言其說法者亦復如是若將護於他恐生驚怖隱覆如是甚深之義但以禱句綺飾文辭而爲演說則授衆生老病死苦不與無病安樂涅槃說此法時五百比丘不受諸法漏盡意解八千天

人遠離塵垢於諸法中得法眼淨七百天子發阿耨  
多羅三藐三菩提心作是願言我等於未來世當如  
文殊師利得是辯才爾時長老須菩提語文殊師利  
言汝豈不以聲聞乘法爲聲聞說耶曰一切乘法是  
我所乘須菩提言汝爲是聲聞爲辟支佛爲應正等  
覺耶曰我爲聲聞不因他聲而生解故我爲辟支佛  
不捨大悲無所畏故我爲應正等覺不捨本願故須  
菩提言汝云何作聲聞曰彼諸衆生未曾聞法令得  
聞故我爲聲聞又問汝云何爲辟支佛曰衆生法界  
令信令覺是故說我爲辟支佛又問汝云何爲應正  
等覺曰一切諸法法界平等如是了知是故我爲應  
正等覺須菩提言文殊師利汝決定爲住何地曰住  
一切地須菩提言汝豈亦住凡夫地耶文殊師利言  
我亦決定住凡夫地須菩提言汝何密意作是說乎  
曰一切諸法自性平等故說如是須菩提言若一切  
法皆悉平等當於何所建立諸法此聲聞地辟支佛  
地菩薩佛地耶文殊師利言譬如十方虛空界中說  
言此是東方虛空南西北方四維上下亦如是說如  
是言說種種差別非於虛空而有異也是故仁者依  
一切法畢竟空中建立種種諸地之相亦非空性而

有差別須菩提言文殊師利汝已證入正性離生耶  
曰我已證入而亦復出須菩提言云何證入而復還  
出文殊師利言仁者當知此是菩薩智慧方便於正  
性離生如實證入方便而出須菩提譬如有人善於  
射術有一怨敵念欲害之射師有子憐愛甚重時彼  
愛子在曠野中其父謬謂是所怨讎放箭射之子便  
大喚言我無咎何爲見害時彼射師有速疾力急往  
子所却取其箭菩薩亦復如是爲調伏聲聞辟支佛  
故入正位還於彼出不墮聲聞辟支佛地以是義故  
名爲佛地須菩提言云何菩薩而得此地文殊師利  
言若諸菩薩住一切地而無所住爲得此地若一切  
地悉能演說而不住於下劣之地爲得此地若有修  
行爲盡一切衆生煩惱而法界無盡雖住無爲而行  
有爲於生死中如園觀想不求涅槃爲得此地所有  
志願悉令圓滿得無我忍成熟衆生爲得此地得佛  
智慧而不於彼無智人所生瞋恨心爲得此地爲求  
法者轉於法輪而於法界亦無差別如是修行爲得  
此地復次若諸菩薩摧伏魔怨而現作四魔爲得此  
地須菩提言文殊師利此菩薩行一切世間甚爲難  
信文殊師利言如是如是如汝所說是諸菩薩行於

世間超過世法須菩提言文殊師利當爲說此超過  
世間文殊師利言夫世間者名爲五蘊於此蘊中色  
聚沫性受水泡性想陽炎性行芭蕉性識幻性如是  
當知世間本性聚沫陽炎泡幻芭蕉是中無蘊無蘊  
名字無衆生無衆生名字無世間超過世間若於五  
蘊如是正知名爲勝解若正勝解則本來解脫若本  
來解脫則不著世法若不著世法則超過世間復次  
須菩提五蘊本性空若本性空則無我我所若無我  
我所是則無二若本無二則無取捨無取捨故則無  
所著無所著故則超過世間復次須菩提是五蘊者  
屬於因緣若屬因緣則不屬我不屬衆生若不屬我  
不屬衆生是則無主無主則無取無取則無諍無諍  
論者是沙門法如手晝空無有觸礙修行如是空平  
等性超過世間復次須菩提五蘊法界同入法界是  
則無界若是無界則無地界水火風界無我無衆生  
無壽命無欲界及色無色界無有爲無爲生死涅槃  
界入是界已則與世間俱而無所住若無所住則超  
過世間說此超過世間法時二百比丘不受諸法漏  
盡意解各各脫鬱多羅僧衣以覆文殊師利作如是  
言若不於此法門生信解者彼無所得亦無所證爾

時須善提告彼諸比丘言長老汝等少有所得有所證耶諸比丘言若增上慢者則可說言有得有證無增上慢沙門法者無得無證彼於何處生此動念而自謂言我如是得我如是證若於其中有動念者則是魔業須善提言長老如汝所解何得何證作是說乎諸比丘言唯佛世尊及文殊師利知我所得知我所證大德如我所解若不了知苦相作是說言苦我應知爲增上慢如是集應斷滅應證道應修爲增上慢彼不了知苦集滅道相故作是說言乃至道我已修爲增上慢云何苦相謂無生相如是集滅道相若無生相卽是無相無所得於其中無有少苦可知集可斷滅可證道可修若於此說聖諦義中不驚不怖不畏者非增上慢若生驚怖爲增上慢爾時世尊讚彼諸比丘言善哉善哉告須善提此等比丘於迦葉佛法中曾聞文殊師利演說如是甚深之法此等比丘往昔修行是深法故今聞隨順速能了知如是次第於我法中聞是深法生信解者一切當於彌勒法中得入衆數爾時善德天子白文殊師利言仁者於此閻浮提中數數說法我等願請仁者往兜率陀天彼諸天子亦有久殖廣大善根彼若聞法則應解了

以著樂故不能來至佛所聽法而自損減爾時文殊師利卽現神變令善德天子及一切衆會皆悉自謂入兜率陀天宮見彼園林宮殿樓觀欄楯窻牖間錯莊嚴其諸寶臺層級高廣至二十重衆寶網幔天華徧布異類衆鳥翔集和鳴於虛空中有諸天女散曼陀羅華歌詠讚歎遊戲快樂善德天子見是事已白文殊師利言希有文殊云何我等如是速疾已到兜率陀天宮見此園林及諸天衆文殊師利願爲說法爾時長老須菩提告善德言天子汝不離會中而往餘處是文殊師利神通變化令汝自見入兜率天宮爾時善德天子白佛言希有世尊文殊師利遊戲三昧神通變化於一刹那中示現此會悉入兜率天宮佛言天子汝於文殊師利神通變化豈是見耶如我所知文殊師利若欲以恒河沙等諸佛刹土功德莊嚴集一佛國悉皆能現或以指端舉恒河沙諸佛刹土過於上方如恒河沙諸佛土已置於虛空又諸佛刹所有四大海水入一毛孔水性衆生亦不迫迮而皆自見不離海中所有世界諸須彌山王皆悉置於芥子之內依須彌住諸天子等而皆自謂在其本宮又諸佛刹所有五道衆生悉皆安置於其掌中衆妙

資具猶如一切樂莊嚴國咸令得見又諸世界所有  
火聚悉皆安置一兜羅中復次諸佛世界所有日月  
於一毛孔悉能覆蔽隨應所作咸皆作之爾時惡魔  
化作比丘白佛言世尊我等欲見文殊師利現前作  
此神通變化何用如此虛誕之言一切世間所不能  
信爾時世尊告文殊師利言汝當於此衆會示現神  
變爾時文殊師利不起于座入心自在一切法莊嚴  
三昧于時如佛所說神通變化皆悉示現魔與衆會  
及善德天子一切皆見爾時大衆見此神變歎未曾  
有作如是言善哉善哉由佛出現有此正士於世間  
中開是法門現諸神變爾時惡魔以文殊師利威神  
力故作如是言希有世尊文殊師利有此神通今此  
衆會亦爲希有於文殊師利神通變化而得信解世  
尊設有如恒河沙等諸魔不能於此信解善男子善  
女人而作留難我亦惡魔波旬恒求佛便惱亂衆生  
我從今往自立誓願若於此法門流行之處有生信  
解愛樂受持讀誦演說於四面百由旬外不於中過  
世尊然我眷屬有欲斷滅如來法故令修行者其心  
散亂我爲降伏說陀羅尼若善男子善女人於此法  
門書寫讀誦爲人演說諸天魔衆當得善利令說法

者身心悅豫精勤修習與無礙辯才及陀羅尼承事  
供給衣服飲食臥具湯藥令無所乏卽說呪曰

怛姪他一阿末麗二毗末麗三替唎低四阿羯楞五

是多設堵嚕六普曳杜野筏低七部多筏低伽米麗

八囑低九蘇普低十普普細十一地唎蘇溪十二惛提十三

可詣十四米洗禮十五央矩麗跋麗十六呼盧忽黎十七索醯

八輪戍米提地唎十九阿那筏低底底使咤泥二十吃利

多唎低二十一吃唎多費低二十二肥盧遮都費低漫怛

囉悖馳那馳路迦二十三阿去聲跋羅目多瞋嘽蘇唎耶

四十二

世尊若善男子善女人專精受持此施羅尼心不散

亂常爲諸天龍神夜叉乾闥婆阿脩羅迦樓羅緊那

羅摩睺羅伽等之所守護一切惡鬼無能得便彼魔

波旬說此呪時三千大千世界六種震動爾時世尊

告魔波旬善哉善哉汝之辯才當知皆是文殊師利

神通境界於是文殊師利現神通力及魔波旬說呪

之時三萬二千人發阿耨多羅三藐三菩提心時

文殊師利還攝神力令此衆會皆悉自見如本而住

爾時文殊師利告善德天子言善男子汝往兜率陀

天徧告天衆言我當來彼時善德天子聞是語已禮

經

世尊足并諸菩薩大德聲聞與其眷屬恭敬圍遶於  
衆會前忽然不現須臾已至兜率陀天爾時善德徧  
告諸天子言汝等應知文殊師利憐愍汝故欲來至  
此汝等應當捨諸欲樂遠離憍慢恭敬尊重隨順聽  
法爾時善德天子如所應辦莊嚴道場即便合掌作  
如是言文殊師利今正是時於是文殊師利與一萬  
菩薩五百聲聞及天龍夜叉乾闥婆等前後圍遶禮  
佛足已於會中沒現兜率陀天與諸菩薩聲聞大衆  
於彼道場隨敷而坐時諸大衆悉聞四天王宮三十  
三天夜摩兜率及以化樂他化自在諸天子等魔衆  
梵衆乃至有頂互相唱言文殊師利今在兜率陀天  
方欲說法諸天聞已無數百千皆來集會盡此欲界  
天宮所不容受時文殊師利卽以神力令彼諸天自  
見寬廣不相妨礙爾時善德天子白文殊師利言大  
衆已集願爲說法文殊師利告善德天子言有四種  
法菩薩住於不放逸者則能攝取一切佛法何等爲  
四一者住於戒律而具多聞二者住於禪定而行智  
慧三者住於神通而起大智四者住於寂靜而常觀  
察天子有八種法入於戒律何等爲八一者身清淨  
二者語清淨三者意清淨四者見清淨五者頭陀功

德清淨六者命清淨七者捨離一切詐現異相以利  
求利清淨八者不捨一切智心清淨是名八法入於  
戒律天子復有八法入於多聞何等爲八一者尊重  
二者下心三者發起精進四者不失正念五者隨聞  
受持六者心善觀察七者如聞轉教八者不自讚毀  
他是名八法入於多聞天子復有八法入於禪定何  
等爲八一者寂靜住阿蘭若二者捨離憤鬧三者不  
染境界四者身心輕安五者心緣定境六者絕諸聲  
相七者減食支身八者不取聖樂是名八法入於禪  
定天子復有八法入於智慧何等爲八一者蘊善巧  
二者界善巧三者處善巧四者緣起善巧五者諦善  
巧六者三世善巧七者一切乘善巧八者一切佛法  
善巧是名八法入於智慧天子復有八法入於神通  
何等爲八一者天眼通見無障礙故二者天耳通聞  
無障礙故三者他心通觀一切衆生心故四者宿命  
通憶念前際故五者神足通示現一切神變故六者  
漏盡通盡一切衆生漏故七者不住煩惱不取解脫  
方便力故八者不依聲聞解脫而入涅槃是名八法  
入於神通復有八法能入於智何等爲八一者苦智  
二者集智三者滅智四者道智五者因智六者緣智

七者三世智八者一切智是名八種復有八法入於  
寂靜何等爲八一者內寂靜二者外寂靜三者愛寂  
靜四者取寂靜五者有寂靜六者生寂靜七者一切  
煩惱寂靜八者三界寂靜是名八法復有八法入於  
觀察何等爲八一者戒二者聞三者禪定四者智慧  
五者神通六者智七者寂滅八者不放棄天子是名  
八法菩薩安住不放棄故諸佛菩提及菩提分法一  
切當得是故天子應當依是不放棄住汝等天子依  
不放棄則三種樂常不損減何等爲三一者天樂二  
者禪樂三者涅槃樂復次諸天子依不放棄住者得  
離三苦何等爲三所謂行苦苦苦壞苦又不放棄者  
超三種畏何等爲三所謂地獄餓鬼畜生又不放棄  
者得超三有何等爲三所謂欲有色有無色有復次  
諸天子依不放棄住者得離三垢何等爲三所謂貪  
垢瞋垢癡垢又不放棄於三學處當得圓滿何等爲  
三所謂增上戒增上心增上慧不放棄者常得親近  
供養三寶何等爲三所謂佛寶法寶僧寶復次依不  
放棄住者得離三種波羅蜜障何等爲三一者自慳  
二者於行施人心生憎嫉三者隨順慳人自破戒憎  
嫉持戒者隨順破戒人自瞋憎嫉忍辱者隨順瞋恚

人自懈怠憎嫉精進者隨順懈怠人自散亂憎嫉禪定者隨順散亂人自無智慧憎嫉智者隨順無智人汝等諸天子是名依不放逸住者當得遠離三波羅蜜障復次諸天子依不放逸住者當得三種波羅蜜伴助何等爲三所謂施增長不求果報回向菩提戒增長不求生天回向菩提忍辱增長於一切衆生不生害心回向菩提精進增長種種善根無有厭足回向菩提禪定增長心不散亂回向菩提智慧增長常修善業回向菩提是名依不放逸住得此波羅蜜三伴助是故諸天子住不放逸增長一切善法佛所印可復次一切法如虛空是四正勤應當觀察何等爲四所謂諸法無作未生不善法爲不生故發起精進法性清淨已生不善法爲除滅故發起精進諸法寂靜未生善法令得生故發起精進一切法無處無行已生善法住不失故發起精進天子是諸菩薩四正勤佛所印可復次諸天子法性平等無生無滅依此法性無所得故不作諸惡順法性故勤修衆善如是修者爲無所修復次於一切法不取不捨是名正勤復次諸天子應觀四念處所謂無身住處無受住處無心住處無法住處無住處無建立處是名念處

復次應觀四如意足一者身心不懈樂修善法故二者爲成熟一切衆生發起精進斷貪欲故三者一切法不可得而證諸佛法故四者心如幻化法無所依超過一切取著故復次應觀五根一者信根決定安住於諸法中爲上首故二者精進根徧修諸行成就佛身故三者念根具足諸法心善調柔無忘失故四者定根遠離攀緣不隨昏瞋故五者慧根決斷諸法正觀現前不隨他故何謂諸力所謂安住如是諸法性中一切煩惱無能沮壞是名爲力住是力故便得勝法如實了知非異非如說名覺分若於諸法隨順覺了由是道故次第修行通達祕密於法不動說名聖道是故諸天子應如是修三十七品菩提分法出過諸行無復障礙智慧熾然究竟寂靜云何名爲究竟寂靜謂諸法無起亦無所盡無所盡故則無所作無所作故亦非無作無受無受者無施設是名究竟寂靜說此法時一萬二千天子於諸法中得法眼淨爾時善德天子白文殊師利言菩薩云何修習於道文殊師利言天子若諸菩薩不捨生死而令衆生入於涅槃不捨愛取而拔出衆生令立聖道是名菩薩修習於道復次天子修習道者善巧安住清淨性空

何以故菩薩以寂靜心見一切法自性清淨爲諸衆生樂著諸見安住隨眠無方便者演說諸法自性空義所以者何是諸衆生於自性空中而生見故是菩薩以無相無願無所作一切法自性不生爲諸凡夫久習煩惱生滅見者於此無生令得信樂而於生滅亦無所動天子是名菩薩修習於道復次天子應見菩薩去來之道諸天子言文殊師利云何菩薩去來之道文殊師利言天子菩薩證菩提而去如應說法而來得諸禪定解脫而去現生欲界中來入於聖道故去大悲成熟衆生故來得無生法忍而去忍受衆生故來於一切法出離故去拔出衆生故來普願堅固而去普願無自性而來三解脫門而去故受生而來菩提道場故去爲安立衆生於菩提故來天子是名諸菩薩去來之道說此菩薩道時五百菩薩得無生法忍爾時善德天子白文殊師利言我等曾聞有世界名一切功德光明爲在何處何等如來於中說法文殊師利言天子彼一切功德光明世界在於上方過十二恒河沙佛刹普賢如來於中說法諸天子言我等願欲見彼世界及彼如來爾時文殊師利卽入光明莊嚴三昧以三昧力放大光明過十二恒河

沙佛刹徧照一切功德光明世界時彼菩薩問此光明從何所來彼佛告言善男子下方過十二恒河沙佛刹有世界名娑婆彼土有佛名釋迦牟尼如來應正等覺在世說法彼有菩薩名文殊師利入光明莊嚴三昧放大光明徧照十方無量佛刹是其光明來照此會彼諸菩薩卽白普賢如來我等願見釋迦牟尼世尊及文殊師利菩薩時普賢如來放大光明照十二恒河沙佛刹至娑婆世界令彼菩薩分明見此菩薩聚會時彼世尊告諸菩薩誰能往彼娑婆世界爾時持法炬菩薩摩訶薩白佛言世尊我能往彼娑婆世界佛言今正是時爾時持法炬菩薩與十億諸菩薩俱於彼國沒現兜率隨天放大光明徧照世界時諸天龍夜叉乾闥婆阿脩羅迦樓羅緊那羅摩睺羅伽釋梵護世諸天子等及諸聲聞菩薩大衆得未曾有作如是言此諸菩薩遊戲神通甚爲希有爾時衆會因此光明見一切功德光明世界及見普賢如來國界莊嚴於一劫中說不能盡當此文殊師利現神變時七那由他諸天子等發阿耨多羅三藐三菩提心爾時持法炬菩薩白文殊師利言可共禮觀釋迦如來時文殊師利於彼天子應可度者皆悉度已

與持法炬諸菩薩衆及大聲聞天龍夜叉乾闥婆等  
往詣佛所到已頂禮佛足却住一面爾時持法炬菩  
薩白佛言世尊普賢如來問訊世尊少病少惱起居  
輕利安樂行不爾時世尊告彼諸菩薩言善男子此  
文殊師利及持法炬正士神通變化智慧光明成熟  
衆生奉事諸佛一切菩薩不能知其智慧方便深入  
邊際汝善男子應當學此文殊師利及持法炬正士  
并諸菩薩所有神通辯才智慧奉事諸佛成熟衆生  
此諸正士無數劫來從一佛刹至一佛刹常作佛事  
若諸衆生入此正士境界當來不復墮於魔界爾時  
世尊告長老阿難汝善持此法門不斷三寶種故爾  
時持法炬菩薩摩訶薩從此會起與其眷屬還本佛  
刹佛說此經已善德天子長老阿難一切世間天龍  
乾闥婆阿脩羅等聞佛所說皆大歡喜

大寶積經卷第一百一

校譌

第二十三紙

四行東南  
藏作士

音釋

諮

津私切  
訪問也

溺

乃歷切  
沒也

澀

色入切

綺飾

綺去倚切  
文飾也  
飾設職切

飾

怨於袁切  
仇也  
飾時

欄楯

楯豎尹切  
闌楯也

迫

迫音百隘也。逆側格切狹也。

憤開

憤古對切。心亂也。開女教切。不靜也。

丹陽居士賀學易室荆氏共施費刻此  
大寶積經第一百一卷  
長洲徐普書  
溧水芮一鶚刻  
萬曆丙申孟春徑山興聖萬壽禪寺識

大寶積經卷第一百二

隋三藏達摩笈多譯

善住意天子會第三十六之一

緣起品第一

如是我聞。一時婆伽婆住王舍城耆闍崛山內。與大比丘衆六萬二千人俱。皆是大德具足神通諸大聲聞。而爲上首。爾時復有四萬二千菩薩摩訶薩。其名曰文殊師利菩薩。師子幢菩薩。彌勒菩薩。觀世音菩薩。大勢至菩薩。大辯聚王菩薩。陀羅尼自在王菩薩。善丈夫菩薩。須彌頂菩薩。須彌幢菩薩。不可動菩薩。

善思義菩薩善思義意菩薩善思惟菩薩思心菩薩  
勇意菩薩善思菩薩寶髻菩薩山相擊王菩薩寶手  
菩薩寶意菩薩寶印手菩薩常舉手菩薩常下手菩  
薩常精進菩薩度衆生菩薩上精進菩薩如言行菩  
薩上願菩薩燈手菩薩心平等菩薩除惡道菩薩除  
諸憂暗菩薩不捨重擔菩薩日藏菩薩月藏菩薩金  
剛步菩薩無邊步菩薩無量步菩薩不動行步菩薩  
虛空藏菩薩勝意菩薩益意菩薩增上意菩薩成行  
菩薩持地菩薩月光菩薩月幢菩薩光德菩薩明照  
菩薩勇步菩薩師子奮迅吼音菩薩無礙辯菩薩相  
應辯菩薩捷疾辯菩薩最勝菩薩翳日月光菩薩無  
攀緣菩薩無著意菩薩常笑菩薩喜根菩薩除諸障  
蓋菩薩轉女身菩薩摩尼珠菩薩燈明菩薩毗盧遮  
那菩薩火燄菩薩衆勝王菩薩深說者菩薩如是等  
菩薩摩訶薩而爲上首爾時復有四天大王忉利天  
王娑婆世界主大梵天王如是等而爲上首與六萬  
諸天衆俱復有善任意天子善德天子大自在天子  
如是等而爲上首與三萬諸天衆俱於菩薩道皆已  
久任復有二萬阿脩羅王羅睺阿脩羅王須彌阿脩  
羅王如是等而爲上首亦皆已住於菩薩道復有六

萬諸大龍王阿那婆達多龍王勝月龍王如是等而  
爲上首亦皆已住於菩薩道并餘無量諸天龍夜叉  
乾闥婆阿脩羅迦樓羅緊那羅摩睺羅伽億百千衆  
乃至一切比丘比丘尼優婆塞優婆夷無量大衆皆  
來集會爾時世尊以如是等無量百千大衆圍遶於  
說法時文殊師利菩薩摩訶薩卽於已室入彼無諍  
除心三昧寂然不動於是文殊師利一心安庠從三  
昧起應時十方無量無邊諸佛世界六種震動時文  
殊師利起三昧已作如是念彼無量無邊諸世界中  
乃有一佛如來應供正徧覺出興於世如優曇華希  
復現耳如是諸如來應供正徧覺世間希有出現甚  
難所可說法盡諸有生寂滅涅槃不可思量無有分  
別甚深無譬難解難知然以諸佛不出世故不可得  
聞以不聞故諸衆生苦難可窮盡我今應當詣於如  
來正徧覺所諮問是義問斯義故令諸衆生成就善  
根亦令一切行菩薩者於彼甚深不可思議諸佛法  
中無復疑惑皆得成滿佛菩提事然此娑婆世界諸  
衆生等多有貪欲具足瞋恚成就愚癡斷除白法頑  
鈍誑詐無有慙愧我慢貢高遠離諸佛違背法僧令  
彼衆生得聞如是甚深妙法獲淨智眼爾時文殊師

利復作是念我今應當大集十方諸菩薩衆令皆得  
聞如來所說是妙法門證深法忍爾時文殊師利如  
是念已卽入普光無垢莊嚴三昧入此三昧已放大  
光明照於東方如恒河沙等諸佛世界普皆柔和潤  
澤清淨明朗無垢微妙難稱而此光明徧照南西北  
方四維上下十方世界其間所有一切暗冥幽隱之  
處山崖樹林大小諸山日月隣陀山摩訶目真隣陀  
山鐵圍山大鐵圍山及餘黑山須彌山大須彌山如  
是一切光明朗徹無有障礙爾時十方恒河沙世界  
所有諸佛現說法者彼諸弟子各請其佛言世尊何  
因緣故乃有如是大瑞光明現於世間世尊我從昔  
來初未聞見如是光明如是清淨如是微妙世尊此  
何光明而令我等大喜偏身心得清淨亦令衆生無  
復貪欲瞋恚愚癡煩惱衆惡一切不行世尊今此光  
明誰之所作誰所加持而來現此彼諸侍者如是請  
已彼諸世尊默然無報當爾之時十方世界一切所  
有諸種音聲所謂若天聲若龍聲若夜叉聲若乾闥  
婆聲若阿脩羅聲若迦樓羅聲若緊那羅聲若摩睺  
羅伽聲若人聲若非人聲若象馬聲若諸獸聲如是  
等聲咸皆止息若風聲若火聲若水聲若大海波聲

若音樂聲若歌讚聲當爾之時如是諸聲以佛力故亦皆止息一切寂然時彼十方諸佛侍者復請彼佛言世尊惟願大慈憐愍一切諸天人故安樂一切諸天人故利益一切諸天人故爲我宣說如是光明所從來處而能普照諸佛國土爾時十方諸佛卽以十方恒河沙數世界所有一切諸如來聲悉同梵音如一如來口業所說其所說事亦無差殊用是妙聲各皆報告已之侍者當彼諸佛出聲告時一切佛刹悉皆震動百千樂音一時皆作乃至一切天人阿脩羅所有音樂不鼓自鳴又彼樂音衆聲之中出諸法音所謂無常聲苦聲無我聲空聲無相聲無願聲離欲聲解脫聲法界聲如如聲實際聲檀波羅蜜聲尸波羅蜜聲羸提波羅蜜聲毗梨耶波羅蜜聲禪波羅蜜聲般若波羅蜜聲大慈聲大悲聲大喜聲大捨聲和合聲利益聲出離聲出如是等種種百千諸法之聲又彼種種諸聲出時無量阿僧祇億那由他百千衆生皆得住於不退轉阿耨多羅三藐三菩提復有成就辟支佛者成聲聞者乃至得成大梵天王天帝釋轉輪王等爾時十方諸佛世尊咸各告其侍者弟子言諸善男子汝今不應請問是事何以故此光明因

緣一切聲聞辟支佛等非其境界我若說者乃至世  
間天人阿脩羅皆卽迷沒是故不應請問斯事諸佛  
如來若說如是光明因緣乃是能生成就不可思議  
諸勝善根亦緣如是不思議諸勝善根而得出生所  
謂布施持戒忍辱精進禪定智慧諸度等行如是諸  
行卽是光明之所出生亦爲光明之所成就是故我  
等諸佛如來若於一劫若減一劫讚說如是光明功  
德終不能盡又以如是慈悲喜捨諸善根力共相熏  
修令此光明能生歡喜時彼十方諸佛侍者各自殷  
勤再三啓請白言惟願世尊憐愍一切諸天人故安

欲令十方世界無量阿僧祇諸菩薩衆大集故令彼  
諸菩薩得勝法故以是因緣彼文殊師利放大光明  
照諸佛土爾時十方世界諸佛侍者復各請問彼諸  
佛言世尊彼文殊師利住何三昧放此光明爾時十  
方諸佛咸各告其侍者弟子言諸善男子彼文殊師  
利入普明無垢莊嚴三昧故放斯光明侍者菩薩復  
白諸佛言世尊我初未見如是光明如是清淨如是  
能令身心歡喜諸佛復告諸菩薩曰彼將不欲教諸  
菩薩起修行耶彼將不欲大集諸菩薩衆耶彼將不  
欲集諸菩薩宣說如斯妙經典耶爾時十方無量不

可思議恒河沙等諸佛世界一一世界中有無量阿  
僧祇諸菩薩衆各自詣彼諸世尊所頂禮佛足禮已  
卽復請曰彼諸佛言世尊誰有是光誰有斯德我等  
昔來未曾見聞忽現是光照諸世界時彼諸佛復告  
彼諸菩薩衆曰諸善男子彼有世界名曰娑婆其佛  
號釋迦牟尼如來應供正徧覺今現說法彼有菩薩  
名文殊師利具大威德其爲大集一切菩薩摩訶薩  
衆故放斯光明時彼諸菩薩復曰彼諸佛言世尊我  
等今者願詣娑婆世界意欲奉見釋迦如來禮拜恭  
敬故供養承事故請問義理故并欲見彼文殊師利  
及餘菩薩摩訶薩故彼諸世尊卽便告彼諸菩薩言  
諸善男子欲往隨意汝應知時爾時十方無量阿僧  
祇不思議不可計不可稱不可量億那由他百千類  
娑羅菩薩摩訶薩各禮佛足已猶如壯士屈伸臂頃  
各於彼世界沒而來現此娑婆國土是時十方諸來  
菩薩摩訶薩衆皆詣世尊釋迦如來應供正徧覺所  
其間或有能雨衆香所謂塗香末香及以香鬘來詣  
世尊釋迦如來應供正徧覺所或有菩薩雨諸妙華  
所謂優鉢羅華鉢頭摩華拘物頭華分陀利華瞻波  
迦華波吒利華陀利華阿他目多迦華蘇摩那

華婆利師迦華曼陀羅華摩訶曼陀羅華波盧沙華  
摩訶波盧沙華旃陀羅華摩訶旃陀羅華微妙旃陀  
羅華所迦羅華摩訶所迦羅華最妙所迦羅華雨如  
是等種種華鬘來詣世尊釋迦如來應供正徧覺所  
或有菩薩摩訶薩能出百千上妙諸音來詣世尊釋  
迦如來應供正徧覺所復有菩薩摩訶薩能以一音  
徧滿三千大千世界歌讚佛德來詣世尊釋迦如來  
應供正徧覺所以如是等種種莊嚴咸詣世尊釋迦  
如來應供正徧覺所時彼十方諸來菩薩摩訶薩衆  
大集於此娑婆世界而此三千大千世界所有衆生  
地獄畜生餓鬼若閻魔界悉皆寂然身心安樂無有  
貪欲瞋恚愚癡遠離衆毒嫉妬諂誑我慢熱惱一切  
衆生皆起慈心具足歡喜何以故以彼十方諸大菩  
薩威神力故其事若是爾時十方無量百千億那由  
他諸大菩薩摩訶薩等咸集世尊釋迦如來應供正  
徧覺所到佛所已頭面禮敬右遶三匝住於虛空卽  
入菩薩隱身三昧入三昧已隨意所生無量百千種  
種妙色大蓮華座結跏而坐悉皆隱身今不復現爾  
時尊者摩訶迦葉見彼殊特希有瑞相大神通事復  
見彼衆大雨華香亦見彼作無量樂音又復見彼放

大光明又亦見此三千世界諸四天下皆雨妙華積  
至于膝又復見彼一切大衆天龍夜叉乾闥婆阿脩  
羅迦樓羅緊那羅摩睺羅伽人及非人乃至所有比  
丘比丘尼優婆塞優婆夷等一切皆悉具足成就金  
色相身於是尊者摩訶迦葉從座而起正持威儀偏  
袒右肩右膝著地合掌恭敬以偈讚曰

歡喜常與一切樂 圓滿無垢清淨顏  
十力雄猛諸大人 具足金剛百福相  
遊於三界人天間 一切無能如佛者  
不可思議難測度 惟願除斷我疑心

過那由他百千劫 常行布施攝世間  
遠離執著無所依 淨持禁戒無倫比  
具足修忍超世間 一切力中十力最  
功德備滿無過者 惟願永絕我疑心  
過百千劫修衆行 以見衆生受諸苦  
勇猛精進終無疲 常生歡喜無有量  
頭目髓腦持與人 棄捨男女及妻妾  
厭離國城及衆具 惟願除解我疑網  
世尊往昔行施時 象馬輦輿不可數  
過那由他上衣服 常以歡喜惠世間

世尊常以先心施

如是襍物及衆珍

飲食湯藥并田宅

是故今日我諮問

往昔割身及耳鼻

內心無垢不生瞋

若他詰問如法言

猶能巧說忍辱力

以能通達深空法

心意微妙難稱量

能施他樂功德人

是故今我問無垢

諸漏久盡患悉除

深見衆生沒諸苦

黑暗所覆愚癡者

生於垢濁及我人

憐愍諸有起慈心

過百千劫勤修行

開發正覺菩提岸

惟願除斷我今疑

善能出入神通門

隱顯自在巧行住

證得無我破我相

毀壞諸法亦非空

佛於世中無染著

眞實正行及正思

微妙寂滅離諸垢

惟願爲我決此疑

世尊昔日修行時

施戒忍進無暫廢

禪定智慧亦常修

利益羣生無有比

諸功德聚難思量

深大如海無窮盡

善能往來亦善住

惟願爲我作歸依

往昔無垢修大慈

怖鴿歸投救不捨

剗身割股血滂流

稱肉與鷹而代之

全身上稱謂敵彼

而鴿尚重身猶輕

大明善巧以行慈

惟願爲我決疑惑

須彌動搖衆星落

諸天宮殿盡破亾

四大海水一朝枯

阿脩羅宮處天上

假使日輪墜於地

明月處空忽闇冥

諸佛正覺兩足尊

所言真誠無有二

爾時尊者摩訶迦葉說偈讚已復白佛言大德世尊何因緣故世間有是微妙光明復何因緣忽現如是不曾有瑞衆相明了爾時世尊告大迦葉言迦葉汝今不應諮問是事何以故如是境界非諸聲聞緣覺所知若我說是光明義者一切世間天人阿脩羅皆當驚疑入迷沒處是故汝今不應問也時大迦葉復白佛言世尊惟願大慈憐愍一切諸天人故利益一切諸天人故安樂一切諸天人故說此光明甚深因緣令我開解爾時世尊告迦葉言汝宜諦聽善思念之吾爲汝說大迦葉言善哉世尊願樂欲聞惟垂敷演時佛復告大迦葉言迦葉今我文殊師利入彼普明無垢莊嚴三昧三昧力故放斯光明徧照十方過恒沙等諸佛國土爲大集彼無量無邊不可數不可量阿僧祇諸大菩薩摩訶薩等而來至此娑婆世界

彼等皆已頂禮我足右遶三匝處在虛空高一多羅樹皆各於彼大蓮華座結跏而坐爾時尊者大迦葉復白佛言世尊今有何等菩薩摩訶薩威神德力而雨如是微妙華香復出如是百千音樂不鼓自鳴佛告大迦葉言迦葉是爲十方諸菩薩等威神力故而雨如是勝妙華香乃至於上虛空之中無量樂音皆自鳴也迦葉復言世尊我於是中乃至不見彼一菩薩云何世尊更言十方諸菩薩等迦葉一切聲聞辟支佛等終不能見彼諸菩薩摩訶薩衆何以故迦葉是中聲聞辟支佛等於大慈悲非其所住故若能住是慈悲地中斯則能爲利益他事則亦能行布施持戒忍辱精進禪定智慧諸波羅蜜等若已受正位終不能行此諸菩薩所行之處迦葉斯諸菩薩摩訶薩等一切皆入隱身三昧是故一切聲聞辟支佛不能見彼諸菩薩等惟除諸佛及大菩薩住斯地者乃能見耳迦葉初住大乘諸菩薩等尚不能見何況一切聲聞辟支佛而能得見若得見者無有是處爾時大迦葉復白佛言世尊菩薩摩訶薩具足幾法修何善根獲何功德而能入是隱身三昧佛言迦葉菩薩摩訶薩成就十法卽能獲是隱身三昧何等爲十一者

志性和柔深住正信二者恒不捨離一切衆生三者  
畢竟成滿大慈悲心四者覺了一切不著衆相五者  
雖復思求一切佛法終不妄取六者亦不思想一切  
聲聞辟支佛智七者世間所有盡皆能捨乃至身命  
尚無恡惜豈況餘物而不施者八者雖行無量生死  
煩惱而不染著諸有爲行九者常修無量布施持戒  
忍辱精進禪定智慧而不分別諸波羅蜜十者常生  
是心我當安立一切衆生於菩提已然後方當坐佛  
樹下不取菩提及衆生相迦葉是爲菩薩摩訶薩具  
足十法便能獲得隱身三昧爾時尊者大迦葉復白  
佛言希有世尊快說斯事世尊乃能作如是說世尊  
一切聲聞辟支佛尚皆未曾一發是心我當安置一  
切衆生於阿羅漢地況佛法乎佛言迦葉如是如是  
是故一切聲聞辟支佛悉無能入菩薩所行隱身三  
昧此三昧名尚自不知云何能入若能入者無有是  
處爾時尊者大迦葉復白佛言世尊我等今者深願  
見彼諸大菩薩摩訶薩等所以者何斯諸大士難可  
會遇佛言迦葉汝宜且住當須待我文殊來者彼諸  
菩薩當從定出汝等然後乃見之耳雖然迦葉汝亦  
得是無量百千諸三昧門今當攝心求彼菩薩摩訶

薩等爲在何處任何威儀作何事業時大迦葉蒙聖  
教已承佛威神及已通力卽入二萬諸三昧門如是  
思求彼諸菩薩今在何所任何威儀爲行步耶而竟  
不見爲住立耶而亦不見爲倚臥耶而亦不見爲端  
坐耶而亦不見乃至不知以何語言作何事業來何  
所從去何所至於起定前白佛言甚竒世尊甚竒  
世尊我已經歷二萬定門求諸菩薩竟無所見世尊  
彼諸菩薩摩訶薩等尚未證知薩婆若處已得如是  
微妙三昧何況當證無上菩提世尊諸善男子善女  
人其有見聞如斯神變而不疾發阿耨多羅三藐三  
菩提心者無有是處世尊能得如是隱身三昧菩薩  
摩訶薩爲欲度彼一切衆生被精進鎧然終不得離  
是妙定佛告迦葉如是如是如汝所說是中一切聲  
聞辟支佛尚非境界況餘衆生爾時尊者舍利弗作  
如是念世尊稱我聲聞人中智慧第一我今寧可求  
諸菩薩今在何所任何威儀作何事業若得親見不  
亦善乎時舍利弗如是念已承佛威神及自力故卽  
入三萬諸三昧門周旋觀察彼諸菩薩今爲何所住  
何威儀乃至不知如毫釐相爾時尊者須菩提作如  
是念我今亦當求諸菩薩爲何所在任何威儀造作

何事若覩見者不亦善乎時須菩提作是念已承佛  
威神及自力故卽入四萬諸三昧門周徧推求彼諸  
菩薩爲何所在住何威儀乃至不見行住坐臥從何  
所來去何所至然後出定前至佛所頭面禮足白言  
世尊世尊記我聲聞人中無諍三昧最爲第一是三  
昧門我亦已得如是世尊我若入定正使有人具大  
神力能以百億四天下爲一大鼓取須彌山爲一大  
椎於我定時令一大人住在我前執彼大椎槌擊大  
鼓無暫休廢乃至經劫如是鼓聲尚不入耳何況亂  
心能令我出若彼鼓聲能爲定患牽我起者永無是  
處世尊我今所得無諍三昧弘普若是我向經歷四  
萬三昧周徧推求彼諸菩薩終不能見乃至不覩一  
人暫時往來之相如是世尊有諸菩薩摩訶薩輩念  
求如是不思議智爲一一衆生於恒河沙劫生地獄  
中備受衆苦世尊彼求菩薩道故雖經衆苦而不捨  
離如是甚深不思議智如是世尊若我今日漏心未  
盡未得解脫於諸佛法所未知者令我當來常在  
生死更不捨離彼不思議大妙乘也於是世尊讚須  
菩提言善哉善哉誠如汝言汝以信故作如斯說令  
汝此身不取涅槃者以斯善根於當來世過恒沙劫

汝當得作轉輪聖王正法治世然後乃成阿耨多羅  
三藐三菩提又須菩提今此三千大千世界衆生數  
類寧爲多不須菩提言甚多世尊甚多世尊佛言如  
是如是須菩提是諸世界所有衆生成就智慧如舍  
利弗解空第一如須菩提苦行超倫如大迦葉卽令  
如是諸大聲聞共盡知見求彼菩薩若於一劫若於  
百劫若於千劫乃至無量恒河沙劫亦不能見若能  
見者無有是處何以故須菩提彼諸菩薩凡所爲作  
非是一切聲聞辟支佛所行境界是故二乘終不能  
見說此法時是衆會中八萬四千人皆發阿耨多  
羅三藐三菩提心三千世界六種震動爾時文殊師  
利於已住室如是思惟今此十萬億百千數諸大菩  
薩皆已集會吾當復召諸天大衆咸令雲集如是可  
乎時文殊師利旣思惟已卽以神力如意化成八萬  
四千億那由他妙寶蓮華大如車輪純金爲莖白銀  
爲葉勝臧羅網毗瑠璃寶是諸華中皆有化佛及諸  
菩薩結跏趺坐蓮華臺上身紫金色三十二相八十  
種好威德巍巍光明普照照彼蓮華上昇四天王天  
三十三天夜摩天兜率天化樂天他化自在天及諸  
梵天乃至有頂如是略說徧此三千大千世界乃至

百億須彌百億四天下欲界天宮色界天宮彼化蓮  
華無不徧至是諸化佛及菩薩衆出大音聲徧告三  
千大千世界而說偈言

世尊明慧日 希有出世間 譬彼優曇華  
難遇復過是 釋師子人雄 今者現於世

班宣深妙法 永拔衆苦源 諸天雖快樂

誰能保長久 任業還三塗 復受衆苦毒

所習諸欲事 貪愛獨增長 三界本無樂

而愚耽著之 已獲最上難 所謂諸佛出

愚癡放逸人 焉覺苦不斷 汝等當速求

見佛聞正法 若聖涅槃已 雖悔難可追

魔網深可怖 汝等爲放逸 旣被羈羅已

寧有解脫期 獨有求佛法 汝爲衆生資

汝等但速求 三十二妙相 佛能救世間

餘無可依者 世雄甚希有 大慈難思量

無量億數劫 所行不可量 集功德智慧

成就釋師子 闡揚微妙法 甚深難覺知

何處有衆生 及我人壽命 如是破常見

斷已自無餘 放捨一切相 爲衆生說此

宣明真實際 世間絕心行 唯彼空無相

無願亦無作 虛空本無形 不起亦不滅

無來亦無去 智者之所說 無盡無所生

本淨無所有 無相貌可見 無思想能說

衆生本無生 云何得言死 寂滅無衆生

衆生在何處 言音爲說法 法不住言音

亦不在文字 世尊如斯說 諸處徧推求

不見風水火 地亦無分別 慧眼之所宣

色受及與想 行識同虛空 假言彼五陰

其實無積聚 眼耳鼻舌身 心意等諸根

雖說本性空 空亦不可得 色聲香味觸

及以種種法 斯由分別生 分別體空寂

欲界與色界 及彼無色天 皆說如幻化

虛偽不真實 如是諸世尊 爲衆生說法

欲求出衆苦 速歸大導師

彼諸化佛說此偈時於是三千大千世界咸得聞之

有九十六億欲色諸天遠離塵垢得法眼淨二萬天

子厭離衆欲三萬二千天子皆發阿耨多羅三藐三

菩提心一萬行菩薩乘諸天子得無生法忍爾時彼

化如來所可勸召無量無邊阿僧祇億那由他百千

諸天大衆於須臾間悉皆雲集釋迦如來應供正徧

覺所稽首足下右遶三市退住七面以天華香所謂  
優鉢羅華鉢頭摩華拘物頭華分陀利華曼陀羅華  
摩訶曼陀羅華及諸華鬘末香塗香奉散世尊及餘  
供養復以種種天妙樂音歌詠稱讚滿彼虛空時大  
集衆其數甚多難可稱計周徧充滿此四天下無有  
空地如一杖頭而不徧者是諸天人具大威德所散  
諸華滿四天下積至于膝

大寶積經卷第一百二

校謄

第六紙

十九行入

第十七紙

十五行遇

音釋

翳

於計切

髓腦

髓息委切

骨中脂也

輦輦

輦方展切

諸切輦輦

剡

歡切

股

果五切

搗

張瓜切

並車也

剡

剡也

股

髀也

搗

擊也

爾時大集衆中有上首天所謂善住意天子善寂天

丹陽居士賀學易室荆氏共施贊刻此

大寶積經第一百二卷 敬州沙彌性淨對

長洲徐普書 進賢萬鐮刻 萬曆丙申孟春徑山興聖萬壽禪寺識

諸熟滿四天下積至于膝  
空飽如一杖頭而不徧者是諸天人具大威德所敬

天並車也際校餘也汎輪也躡舉也躡舉也躡舉也

天謂也輦輦也輦輦也輦輦也輦輦也輦輦也

音釋輦輦也輦輦輦輦也輦輦輦輦也輦輦輦輦也輦輦輦輦也

### 大寶積經卷第一百三

#### 隋三藏達摩笈多譯

善住意天子會第三十六之二

開寶義品第二

爾時大集衆中有上首天所謂善住意天子善寂天子慙愧天子與如是等九十六億諸天子俱一切皆行菩薩之道咸共往請文殊師利所至其門外右遶七布遶七布已然後雨天曼陀羅華其所雨華遍覆虛空高十由旬成華網臺形如寶塔特文殊師利持此華臺供養世尊供養已卽以神力令此三千大千

世界一切國土虛空之中華網遍覆是華光明普照  
三千大千世界皆大明盛復雨天曼陀羅華爾時文  
殊師利菩薩摩訶薩閑雅安庠從精舍出更以神力  
令所居地自然而有七寶妙座其座巍巍具足莊嚴  
文殊師利斂容整服昇此寶座時善住意天子見文  
殊師利昇寶座已卽以頂禮文殊師利足退住一面  
一切諸天亦皆頂禮文殊師利足爾時文殊師利如  
是思惟誰於今日堪任與我在世尊前對揚深法誰  
爲法器能受如是不思議句甚難證句無處所句無  
所著句無戲論句不可得句不可說句甚深句真實  
句無礙句不可壞句空句無相句無願句如如句實  
際句法界句無形貌句不取句不捨句佛句法句僧  
句智慧滿足句三界平等句一切法無所得句一切  
法無生句師子句勇猛句無句句如斯說已誰聽者  
乎於是文殊師利復更思惟今此唯有善住意天子  
已於過去供養多佛入深法忍具足辯才當能與我  
處世尊前共談實義爾時文殊師利如是念已卽語  
善住意天子言天子汝今已得甚深法忍又能具足  
無礙辯才今當與我詣世尊所對論如是深妙義乎  
時善住意天子報文殊師利言太士我如是說彼若

於我無有語言不爲演說不存諮問亦無報答無佛法衆斷滅三乘無生死無涅槃不合不散不啓不發不出聲音除諸文字如是說者我當共談文殊師利語善住意天子言天子我如是說彼能於我無聽無聞無讀無誦無受無持不思念不取不捨不覺不知不聞我言不爲他說所以者何諸佛菩提本無文字無心離心無有覺悟雖假名說其名亦空善住又言大士今者且爲諸天子說斯諸天子於大士說樂欲聽聞文殊師利言天子我終不爲樂聽者說又亦不爲聞受者說所以者何凡有聽受則爲取著云何取著所謂我著人著衆生著壽命著士夫著以取著故便有聽受如是聽受當知彼住三種縛中何謂三種一見我縛二見衆生縛三見法縛天子若無如是三種見縛而聽法者當知彼住三種淨中何謂三淨一不見自身不分別不思念不證知二不見說者不分別不思念不證知三不見所說不分別不思念不證知天子是則名爲三種淨也天子若有能作如是聽者是平等聽非不平等爾時善住意天子讚文殊師利言善哉善哉快作斯說大士若有能作如是說者當知卽是不退轉說文殊師利言且止天子汝今

不應妄想分別菩薩退轉何以故若使菩薩有退轉者彼終不能成等正覺所以者何是菩提中無退法故善住復言大士若如是者當於何處有斯退轉文殊師利言天子當知從貪欲故有退轉從瞋恚故有退轉從愚癡故有退轉從有愛故有退轉從無明故有退轉乃至從十二有分生死所生故有退轉從因故有退轉從見故有退轉從名故有退轉從色故有退轉從欲界故有退轉從色界故有退轉從無色界故有退轉從聲聞行故有退轉從辟支佛行故有退轉從分別故有退轉從執著故有退轉從相故有退轉從取相故有退轉從斷見故有退轉從常見故有退轉從取故有退轉從捨故有退轉從我想故有退轉從衆生想故有退轉從壽命想故有退轉從士夫想故有退轉從補伽羅想故有退轉從思想故有退轉從繫縛故有退轉從顛倒故有退轉從我見故有退轉從我見爲根本六十二見故有退轉從諸蓋故有退轉從諸陰故有退轉從諸入故有退轉從諸界故有退轉從佛想故有退轉從法想故有退轉從僧想故有退轉如是乃至我當成佛我當說法我度衆生我當破魔我得智慧從是諸想故有退轉如是天

子若能不分別如來十九不分別四無所畏不分別  
十八不共法不分別一切根力覺道不分別諸相好  
不分別莊嚴佛國不分別聲聞不分別菩薩乃至不  
分別一切分別退轉者是名不退轉爾時善任意天  
子復白文殊師利言大士若如是者當於何處得不  
退轉文殊師利言天子當知從通達佛慧故得不退  
轉從空故不退轉從無相故不退轉從無願故不退  
轉從如如故不退轉從法性故不退轉從實際故不  
退轉從平等故不退轉善任意言大士若如是說一  
切諸分別無分別二俱不異所以者何皆從思惟分  
別生故是故得言彼有退轉又問如是退轉爲有法  
耶爲無法乎文殊師利言非有非無如是退轉善住  
意言大士若爾何處退轉文殊師利言若有若無是  
虛妄取是顛倒取是不如取彼則不取亦非不取以  
是義故得言退轉而彼退法不可說有不可說無何  
以故若有無中有退轉者彼卽爲過所以者何若有  
法退轉則墮常邊無法退轉則墮斷邊然世尊說不  
住常中不住斷中非斷非常世尊所說天子若彼於  
先不真實想而彼證知則名非斷非常天子是爲菩  
薩退轉法門說是法時十千天子得無生法忍

文殊神變品第三

爾時善住意天子白文殊師利言大士今可俱行詣  
如來所奉見頂禮諮受未聞亦因此時如法問難文  
殊師利言天子汝莫分別取著如來善住意言大士  
如來何在而言莫著文殊師利言卽在現前善住意  
言若如是者我何不見文殊師利言天子汝今若能  
一切不見是則名爲眞見如來善住意言若現前者  
云何誠我莫取如來文殊師利言天子汝謂今者現  
前何有善住意言有虛空界文殊師利言如是天子  
言如來者卽虛空界何以故諸法平等如虛空故是  
故虛空卽是如來如來卽是虛空虛空如來無二無  
別天子以是義故若人欲求見如來者當作斯觀如  
實眞際覺了是中無有一物可分別者爾時文殊師  
利菩薩摩訶薩復以神力化作三十二所重閣寶堂  
輦軒具足四面正方四角有柱周帀欄楯寶網交絡  
殊特妙好高顯巍巍具足莊嚴甚可愛樂諸堂閣內  
咸有勝牀衆寶所成天衣覆上其牀各有化菩薩坐  
具三十二大人之相爾時文殊師利普現如是莊嚴  
事已遂更與彼蓮華化佛并化菩薩及此寶輦重閣  
殿堂諸菩薩衆俱往佛所繞佛七帀并亦圍繞比丘

衆已踊在虛空光明普照衆會道場四面而住爾時  
文殊師利後善住意發忽然在前先至佛所善住意  
天子反更後到白言大士吾發在前更在後至仁從  
何路乃至於斯文殊師利言天子假使供養滿恒河  
沙諸如來等稽首爲禮終不見吾往來進止爾時華  
臺諸化菩薩及寶堂中諸菩薩衆同聲說偈讚歎如  
來

已曾供養過恒沙

不可思議諸世尊

熾然修行求菩提

是故超出天人上

光明妙色三界雄

牟尼衆相實奇特

爲衆宣說甚深法

無有壽命及人我

世尊行施持淨戒

忍辱精進具修禪

智慧清淨三界表

我禮彼岸最勝尊

其有發意求菩提

則受天人妙供養

若於深空無疑惑

當紹出世大法王

過去諸佛等正覺

現在一切兩足尊

常說如是諸法空

本來無相亦無作

衆生體性不可得

何有生者及死滅

本旣無來亦無去

一切諸法如虛空

如彼化人觀衆事

雖復示現而無眞

世尊說法亦如是  
斯皆虛誑同幻夢  
恒沙世界滿中寶  
持以布施一切人  
若能修忍善說空  
如是行施超於彼  
復於恒沙諸劫中  
供養諸佛天人士  
奉獻香華及眾具  
爲求菩提離世間  
得聞如是甚深法  
無有眾生及命人  
當知彼得明淨忍  
是爲供養十方佛  
於無數劫行布施  
衣食象馬及眾珍  
當知彼非解脫因  
以有我人眾生想  
歸命滅度人中尊  
救濟眾生無量數

諸法皆空本清淨  
如是解脫智莊嚴  
諸佛出世甚難值  
得聞正法生信難  
人身難得今已獲  
善哉佛法汝順行  
已得蠲除斯八難  
永絕迫窄處空閑  
於諸正法得信行  
應當勇猛發精進  
若聞法已應正思  
不可聞聲卽取著  
汝等常行阿蘭若  
必當速疾成人雄  
近善知識及法師  
應速遠離諸惡友  
汝於衆生平等想  
慎勿妄起我人心  
常樂多聞持禁戒  
捐棄舍宅坐林間

腐藥治病莫詐善

亦恒乞食受糞衣

一切有爲卽無爲

等同一相如陽焰

若了實際見真如

疾成無上菩提道

當觀五陰猶如幻

內外諸入如空舍

世尊常說如斯法

法等於彼莫生著

貪欲瞋恚性自空

愚癡我慢分別起

彼法已滅今亦無

如是知者得成佛

如是諸化菩薩說是偈時彼會衆中二萬二千衆生

皆發阿耨多羅三藐三菩提心五百比丘漏盡意解

心得解脫五百比丘尼遠塵離垢得法眼淨七千優

婆塞優婆夷二萬五千諸天子亦離塵垢法眼清淨

二百菩薩得無生法忍於是三千大千世界大地六

種震動所謂動遍動等遍動震遍震等遍震涌遍涌

等遍涌乃至吼起覺等亦復如是

破魔品第四

爾時尊者舍利弗白佛言世尊今此瑞相誰之所爲

能令如是三千大千世界大地六種震動又是寶輦

殿堂蓮華座上諸菩薩等放大光明照斯衆會演說

如是微妙深法復令如是無量億數諸天子衆皆來

集會復有億數諸菩薩等亦來集也爾時佛告舍利

弗斯乃文殊師利威神之力故現如是妙莊嚴事亦  
令菩薩諸天雲集所以者何舍利弗是文殊師利與  
善住意天子將諸大衆欲來我所請問如是破散諸  
魔三昧法門具足成就諸不思議甚深佛法故時舍  
利弗復白佛言世尊若如是者何因緣故我觀此衆  
竟不見彼文殊師利佛告舍利弗汝宜且待今文殊  
師利已與一切魔王一切魔衆一切魔宮作大衰耗  
所爲神變極妙莊嚴將至我所汝當自見於是文殊  
師利卽入破散諸魔三昧三昧力故卽時三千大千  
世界百億魔宮朽故暗冥若將毀壞其變已現無復  
威光令一切魔不樂其所各自見身昏耄羸瘠拄杖  
而行諸天女輩變成老母一切衆魔見是事故心大  
憂愁身毛皆豎惶怖思念是何變恠令吾內外不祥  
若斯將無死沒時至果報離散耶爲是世間將壞劫  
災事乎彼諸魔衆如是念時文殊師利復以神力卽  
現百億天子住在魔前告魔衆曰汝勿憂懼此非汝  
災亦非劫盡所以者何今此適有住不退轉菩薩大  
士名文殊師利有大威神道德超世卽時正入破散  
諸魔三昧法門以彼大士三昧威神其事若此非有  
他也諸化天子說是語時一切魔王及諸魔衆聞諸

化天說文殊師利大士名號更增惶恐戰掉不安一切魔宮皆大震動時諸魔王答化天曰惟願仁慈救我危厄諸化天子復語魔言勿怖勿怖汝等今宜速疾往詣釋迦牟尼佛世尊所所以者何彼佛如來有大慈悲若諸衆生憂恐煎迫但往歸依皆蒙安樂除諸憂苦時諸化天如是語已卽於其處忽然不現爾時一切魔王及語魔衆聞化天教莫不歡欣皆共同心於須臾頃羸弊拄杖皆來住於釋迦牟尼佛前同聲白言大德世尊願見救護願見救護免茲變懼困苦大厄世尊我等寧受百千萬億諸佛名號不願聞彼文殊師利一菩薩名何以故我卽聞是文殊師利菩薩名時便大驚恐若喪自身爾時世尊告諸魔言波旬汝今何忽發如是言所以者何是文殊大士凡所開導利益衆生億百千佛昔所未作今亦不作當亦不作唯此文殊師利去來現在常爲衆生建斯大事衆生熟已置解脫中是故汝等雖復聞彼百千佛名不生苦惱亦無驚怖云何而言我今忽聞一文殊師利名皆大驚恐時彼魔衆白言世尊我誠慙恥此弊老身加以惶懼發斯言耳世尊我等從今歸依正覺惟願哀愍復我本形佛告之曰且待須臾文殊師

利亦既來已自除汝恥於是文殊師利從三昧起遂  
與無量百千天衆復與無量百千諸大菩薩摩訶薩  
等及無量百千諸龍夜叉乾闥婆阿脩羅迦樓羅緊  
那羅摩睺羅伽等前後圍遶復作無量百千微妙樂  
音復雨如是無量妙華所謂優鉢羅華鉢頭摩華拘  
物頭華分陀利華具大莊嚴有大神通威德無極俱  
來佛所頭面禮敬右遶三市退住一面爾時世尊告  
文殊師利言文殊師利汝入如是破散諸魔三昧耶  
文殊師利白言世尊唯然已入佛言文殊師利汝從  
何佛聞是三昧修經幾時而得成滿文殊師利言世  
尊我本未發菩提心時從佛得聞如三昧又聞文  
殊師利彼佛世尊名號何等說是三昧令汝得聞文  
殊師利白言世尊我憶過去無量無邊不可思議阿  
僧祇劫爾時有佛號曼陀羅華香如來應供正遍知  
明行足善逝世間解無上士調御丈夫天人師佛世  
尊出現世時宣說如是破散諸魔三昧我於彼時初  
得聽聞佛告文殊師利如三昧云何修得文殊師  
利白言世尊若菩薩摩訶薩具足成就二十種法則  
能得是破魔三昧何等二十所謂一者訶毀貪欲破  
壞貪心二者訶毀瞋怒破壞瞋心三者訶毀愚癡破

壞癡心四者訶毀嫉妬破壞妬心五者訶毀僞慢破  
壞慢心六者訶毀諸蓋破壞蓋心七者訶毀熱惱破  
壞惱心八者訶毀想念破壞想心九者訶毀諸見破  
壞見心十者訶毀分別破分別心十一訶毀取事破  
壞取心十二訶毀執著破壞執心十三訶毀諸相破  
壞相心十四訶毀有法破壞有心十五訶毀常法破  
壞常心十六訶毀斷法破壞斷心十七訶毀諸陰破  
壞陰心十八訶毀諸入破壞入心十九訶毀諸界破  
壞界心二十訶毀三界破壞三界心世尊是爲菩薩  
摩訶薩具二十法畢竟成就如是三昧世尊菩薩摩  
訶薩復有四法具足修行得是三昧何等爲四一者  
建立心行清淨調柔二者心性淳直無諸諂曲三者  
心無攀緣入深法忍四者外內所有一切能施是爲  
菩薩摩訶薩具足四法成就三昧世尊菩薩摩訶薩  
復有四法能得三昧何等爲四一者畢竟深信二者  
成就實語二者常樂空閑四者不取諸相是爲菩薩  
具足四法成就三昧復有四法菩薩成就得是三昧  
何等爲四一者親近善友二者常知止足三者獨坐  
思惟四者不樂誼猥是爲菩薩具足四法成就三昧  
復有四法菩薩成就得是三昧何等爲四一者不破

壞戒二者不缺犯戒三者無所依戒四者不望報戒  
是爲菩薩具足四法成就三昧復有四法菩薩成就  
得是三昧何等爲四一者捨聲聞心二者離緣覺心  
二者住菩薩忍四者不捨衆生是爲菩薩具足四法  
成就三昧復有四法菩薩成就得是三昧何等爲四  
一者修空捨我二者離相無相三者無願除願四者  
捨諸所有是爲菩薩具足四法能得三昧世尊時彼  
曼陀羅華香如來應供正遍覺說此破散諸魔法門  
我從彼佛聞已初修次復有佛號一切寶電蔽日月  
光如來應供正遍覺我時於彼具足成就彼佛世尊  
說此法門時彼衆會中十千菩薩皆得成就此三昧  
門爾時尊者舍利弗白佛言希有世尊今此文殊師  
利乃能久遠成就如是降魔三昧三昧力故能令波  
旬及諸魔衆髮白老耄形志俱衰一至斯也佛告舍  
利弗於意云何汝今言此文殊師利獨是三千大千  
世界變此衆魔如斯老耄耶舍利弗汝今不應作如  
是見所以者何舍利弗今者十方如恒河沙等諸佛  
世界所有諸魔一切皆悉如是變壞盡是文殊師利  
威力所爲於是世尊告文殊師利言文殊師利汝今  
當且攝汝神力令彼衆魔得復本形爾時文殊師利

受佛教已告諸魔曰衆仁者實爲獸患此身儀耶魔  
報曰唯然大士文殊師利言若如是者汝今亦當獸  
患貪欲勿著三界諸魔報曰善哉大士敬聞嘉論豈  
敢有違惟願少假威神除此慙苦文殊師利遂攝神  
力令一切魔復彼天形莊嚴如故爾時文殊師利告  
諸魔言波旬汝所有眼何者爲眼何者眼想如是何  
處是眼著是眼相是眼攀緣是眼障礙是眼思是眼  
我是眼依止是眼喜樂是眼戲論是眼我所是眼護  
是眼念是眼取是眼捨是眼分別是眼思量是眼成  
就是眼生是眼滅乃至是眼來去如是等法爲汝境  
界魔業障礙如眼乃至身意亦如是又如色乃至觸  
法爲汝境界魔業障礙亦復如是汝等皆應如實了  
知復次波旬汝所有眼卽爲非眼亦爲無眼爲無眼  
想無眼著無眼相無眼攀緣無眼障礙無眼思無眼  
我無眼依止無眼愛無眼戲論無眼我所無眼護無  
眼念無眼取無眼捨無眼分別無眼思量無眼決定  
無眼生無眼滅無眼去無眼來如是等法非汝境界  
汝於是中不能爲主無法無力不得自在亦無取著  
如眼乃至身意亦如是又如色乃至觸法亦如是汝  
等皆應如實了知文殊師利說是法時衆中一萬魔

王波旬皆發阿耨多羅三藐三菩提心八萬四千諸  
魔眷屬遠離塵垢得法眼淨

菩薩身行品第五

爾時尊者摩訶迦葉白佛言世尊我等願請文殊師  
利令我觀見彼諸菩薩摩訶薩等所以者何世尊斯  
諸大士難可值遇爾時世尊卽告文殊師利言汝應  
當知今此大衆咸皆渴仰思願觀見十方所有諸來  
菩薩摩訶薩身今正是時汝應顯現於是文殊師利  
蒙聖教已卽便告彼法輪菩薩月光菩薩降魔菩薩  
妙音菩薩離垢菩薩寂滅菩薩選擇菩薩法王吼菩

薩如是等無量菩薩摩訶薩言諸大士汝等今宜各  
於宮殿自顯其身分明現汝本國形狀也文殊師利  
發斯語已於是諸菩薩衆從三昧起各現本身令諸  
大衆一切咸見或有菩薩其身高大若須彌山王或  
有菩薩身大八萬四千由旬或有身大百千由旬或  
九千乃至五十四三十二千者或有身大十  
千由旬乃至或有五千四千二千二千者或有身大  
一千由旬乃至或有五百四百三百二百者或有身  
大一百由旬乃至或有五十四三十二千者或有  
身大十由旬者乃至或有五四三二一由旬者如是

乃至或有菩薩身量大小長短寬狹如此娑婆世界  
人身無異當爾之時此三千大千世界大衆充滿無  
有空處如杖頭許其中所有諸大菩薩摩訶薩衆一  
切多是功德巍巍智慧深遠具足威力成就神通放  
大光明遍照十方無量百千諸佛世界乃至一切大  
威德天及諸天龍夜叉乾闥婆阿脩羅迦樓羅緊那  
羅摩睺羅伽人非人等大小諸王皆悉充滿爾時文  
殊師利從座而起整理衣服偏袒右肩右膝著地合  
掌向佛白言世尊我於今者欲少諮問如來應供正  
遍覺所有心疑未審世尊見垂聽不佛告文殊師利

如來應供正遍覺恣汝所問當爲汝釋決汝所疑令  
汝心喜文殊師利言唯然世尊願爲宣說我當聽受  
文殊師利言世尊云何名爲菩薩摩訶薩言菩薩者  
義何謂也佛告文殊師利汝問云何爲菩薩菩薩有  
何義者以能覺了一切法故名爲菩薩摩訶薩也文  
殊師利彼一切法菩薩覺者所謂言說文殊師利菩  
薩云何覺一切法所謂覺眼覺耳覺鼻覺舌覺身覺  
意文殊師利云何菩薩覺眼覺耳乃至覺意文殊師  
利所謂菩薩覺彼眼法本性空故如是覺已終不生  
念我能覺知如是覺耳乃至覺意皆本性空如是覺

已亦不生念我能覺知菩薩如是覺眼等已復覺彼色本性自空如是覺已亦不分別我能覺知如是覺聲乃至覺法皆本性空亦不分別我能覺知是爲菩薩覺一切法也復次文殊師利云何菩薩覺彼五陰所謂菩薩觀見陰體本性自空如斯覺故觀無相如斯覺故觀無願如斯覺故觀無欲如斯覺故觀寂靜如斯覺故觀遠離如斯覺故觀無所有如斯覺故觀無實如斯覺故觀無動如斯覺故觀無生如斯覺故觀無來如斯覺故觀無去如斯覺故觀無真如斯覺故觀無主如斯覺故觀無證如斯覺故觀無知如斯覺故觀無見如斯覺故觀無人如斯覺故觀無想如斯覺故觀不可說如斯覺故觀但有名如斯覺故觀無我如斯覺故觀分別起如斯覺故觀從緣生如斯覺故觀如幻如斯覺故觀如化如斯覺故觀如夢如斯覺故觀如鏡像如斯覺故觀如聲響如斯覺故觀如芭蕉如斯覺故觀不久住如斯覺故觀不牢固如斯覺故觀虛妄如斯覺故觀無物如斯覺故是爲菩薩覺一切法復次文殊師利云何菩薩摩訶薩覺貪恚癡所謂覺彼貪欲因分別起故覺彼瞋恚因分別起故覺彼愚癡因分別起故而亦覺彼分別空無所

有無物無戲論不可說不可證故是爲菩薩覺一切法復次文殊師利云何菩薩摩訶薩覺於三界所謂覺彼欲界無我人故覺彼色界無所作故覺無色界空無有故覺彼三界皆遠離故是爲菩薩覺一切法復次文殊師利云何菩薩摩訶薩覺衆生行所謂覺是衆生貪欲行故覺是衆生瞋恚行故覺是衆生愚癡行故覺是衆生等分行故如是覺已如是證知如是爲說如是教化衆生如是令得解脫是爲菩薩覺一切法復次文殊師利云何菩薩摩訶薩覺一切衆生所謂覺一切衆生但有其名離彼名已無別衆生是故一切衆生卽一衆生彼一衆生卽一切衆生如是衆生卽非衆生若能如是無分別者是爲菩薩摩訶薩覺一切法又復云何覺一切法能如是覺菩提道故是爲菩薩摩訶薩覺一切法爾時世尊重明此義以偈頌曰

|       |       |       |
|-------|-------|-------|
| 覺眼及與耳 | 自體常空寂 | 不言我能覺 |
| 是名爲菩薩 | 觀鼻及與舌 | 本性無所有 |
| 不分別我覺 | 是名爲菩薩 | 智慧觀察身 |
| 亦覺意自然 | 覺已爲他說 | 是名爲菩薩 |
| 色聲香味觸 | 意所樂諸塵 | 覺知本性空 |

是名為菩薩 覺色及受想 諸行與識心

一切斯同幻 是名為菩薩 五陰聚如夢

覺彼無一相 不分別我知 是名為菩薩

不生亦不出 無作復無言 如是說唯名

彼名亦無物 覺貪欲瞋恚 斯由分別起

彼分別無體 畢竟終自空 癡亦分別生

分別因緣生 緣此生諸見 諸見不可得

覺察三界空 一切無真實 於彼不可動

故名為菩薩 欲界不成就 皆緣分別起

色有無色有 一切不牢固 衆生之所行

智者悉明了 貪欲與瞋恚 及彼愚癡等

一切諸衆生 卽彼一衆生 智者無所覺

不念彼衆生 諸法之所起 悉因顛倒生

覺彼顛倒者 知顛倒真相 智慧甚微妙

不取諸音聲 覺已無所著 故名為菩薩

能捨已肉身 終亦無依止 如是覺真實

乃名為菩薩 至持戒彼岸 亦不念彼岸

覺戒行法如 無生亦無盡 慈心遍衆生

不得衆生相 覺彼衆生際 但以假言宣

勇猛大精進 深心默有為 見三界空虛

證無上等覺 常入微妙禪 無著無所依  
 無住無攀緣 智者定如是 能以利智刀  
 斷除諸見縛 觀察法界性 無割亦無傷  
 若人真覺了 一切法如實 應時利衆生  
 乃名為菩薩

大寶積經卷第一百三

校譌 第二紙十一行 第十二紙六行  
南藏作爲 時南藏作間

音釋 腐奉甫切 耄莫報切 羸瘠羸倫爲切弱也 豎

臣吏切 掉徒弔切 諠猥諠許元切猥烏賄切  
立也 諠猥謂諠囂猥雜也

丹陽居士頌學易堂荆氏共施寶刻此  
 對 嚴密唐生於書 粟水同學恭刻 萬曆丙申志度金山真覺世壽福寺藏

大寶積經卷第一百四

隋三藏達摩笈多譯

善住意天子會第三十六之三

破菩薩相品第六

爾時文殊師利白佛言世尊如佛所說菩薩摩訶薩  
 初發心者以何義故名初發心佛告文殊師利若有  
 菩薩等觀三界一切想生如是得言最初發心文殊  
 師利是名菩薩初發心也文殊師利復白佛言世尊  
 如我所解佛說義者若有菩薩貪欲心生是初發心  
 瞋恚心生是初發心愚癡心生是初發心世尊所說

將無謂是爲初發心爾時善住意天子問文殊師利  
言大士若諸菩薩起貪恚癡名初發心者所有一切  
具縛凡夫皆卽名爲發心菩薩所以者何彼諸凡夫  
從昔至今常發如是貪恚癡等三毒心故文殊師利  
語善住意言天子汝言一切凡夫從昔已來常能發  
是三毒心者是義不然何以故一切凡夫心力羸劣  
不能發起是貪恚癡唯有諸佛世尊一切阿羅漢辟  
支佛不退轉地諸菩薩等乃能發是貪恚癡耳是故  
凡夫不能得發善住意言大士仁今何故作如斯說  
令此會衆不識不知陷諸疑網深可怖畏爾時文殊  
師利語善住意言天子於意云何如彼飛鳥往來空  
中彼鳥足跡在虛空中有發行乎無發行也善住意  
言非無發行文殊師利言如是如是天子以是義故  
我作此說若有能發貪欲恚癡唯彼諸佛聲聞緣覺  
不退菩薩乃能發耳天子當知無有依處是名爲發  
無有取著是名爲發旣無依處又無取著是卽無句  
斯謂爲發是無分別句斯謂爲發是不可生句斯謂  
爲發是不實句斯謂爲發是非物句斯謂爲發是不  
來句斯謂爲發是不去句斯謂爲發是無生句斯謂  
爲發是無攀緣句斯謂爲發是無證句斯謂爲發是

不諍句斯謂爲發是不思句斯謂爲發是不壞句斯  
謂爲發是無言句斯謂爲發是不破句斯謂爲發是  
無字句斯謂爲發是無執句斯謂爲發是無住句斯  
謂爲發是不取句斯謂爲發是不捨句斯謂爲發是  
不拔句斯謂爲發天子當知是爲菩薩初發心也天  
子發心菩薩若於如是一切諸法不愛著不想不  
見不知不聞不識不取不捨不生不滅是則名爲真  
發心也天子是菩薩摩訶薩若能依止如是法界如  
是平等如是實際如是方便則彼貪欲瞋恚愚癡等  
發又若決能如是依止則彼眼耳及意等發則彼色  
取乃至識取等發如是則一切諸見發無明有愛發  
乃至十二因緣有分發五欲衆事發愛著三界發我  
見發我所見發我見爲根本六十二見發佛想發法  
想發僧想發自己想發他想發地想發水想發火想發  
風想發空想發識想發四顛倒發四識住發五蓋發  
八邪發九惱發十惡業道發天子當知我今舉要言  
之一切分別一切分別處一切語言一切諸相一切  
進趣一切希求一切取著一切思想一切意念一切  
障礙菩薩皆當發汝應如實知天子以是義故汝今  
若能於此諸法不愛著不想著是則名爲真實發

也爾時世尊讚文殊師利言善哉善哉文殊師利汝今乃能爲諸菩薩具宜如是初發心義文殊師利汝於往昔已曾供養無量無邊過恒沙數諸佛世尊能說斯耳爾時尊者舍利弗白佛言世尊今此文殊師利所說菩薩最初發心及獲無生法忍先後二事平等無差耶佛告舍利弗如是如是如汝所說舍利弗昔燃燈世尊授我記言摩那婆汝於未來過阿僧祇劫當成佛號釋迦牟尼如來應供正遍覺舍利弗我於彼時亦不離此心得無生忍如是舍利弗汝當知彼一切菩薩初發心義如文殊師利所言無有異

也爾時文殊師利白佛言世尊如我解佛所說義者皆是初發何以故如世尊說一切初發皆是不發其不發者卽是菩薩最初發心說是法時二萬三千菩薩證無生忍五千比丘於諸法中漏盡解脫六十億諸天子遠離塵垢得法眼淨爾時尊者大迦葉白佛言世尊今此文殊師利乃更爲斯能作難作宣說如是甚深法門令諸衆生多所利益文殊師利謂迦葉言大德迦葉我實不爲難作之事所以者何一切諸法皆無所作亦復無有已作今作當作唯大迦葉我於諸法非作不作其義亦爾又大迦葉我於衆生無

有度脫亦無繫縛所以者何一切諸法無所有故迦葉云何於世尊前發如是言能作難作又大迦葉我無所作慎勿言我能作難作又大迦葉我實不作非獨我不作如來亦不作辟支佛亦不作阿羅漢亦不作又大迦葉有何等人能作難作若欲正言能作難作但彼一切嬰兒凡夫如斯說者是名善說所以者何如諸如來皆悉無有已得今得當得乃至一切聲聞辟支佛亦無所得唯彼凡夫一切皆得時大迦葉復白文殊師利言大士一切諸佛不得何等文殊師利言一切諸佛不得我不得福伽羅不得衆生不得

壽命不得士夫不得斷不得常不得諸陰不得諸入不得諸界不得諸名色不得欲界不得色界不得無色界不得分別不得思惟不得念處不得因生不得顛倒不得貪恚癡不得此世不得彼世不得我不得我所乃至不得一切諸法大德迦葉如是一切諸法次第不得亦復不失不縛不解不取不捨不近不遠是故迦葉當覺了如是法門若諸佛世尊皆不得者則彼等非法非聞凡夫一切斯得是故凡夫能作難作非諸佛作非辟支佛作非阿羅漢作是乃名爲凡夫作也迦葉復問作何等也文殊師利言作斷作常

作染著作依止作憶念作取捨乃至作彼一切戲論  
分別隨順高下等事是故大德迦葉如是諸法諸佛  
世尊皆無所作無有已作今作當作唯彼凡夫能作  
難作爾時文殊師利復白佛言世尊所言無生忍者  
云何名爲無生忍也世尊復以何義而更名爲法無  
生忍菩薩云何得斯忍法佛告文殊師利言實無有  
人於生法中得無生忍所言得者但有語言名字何  
以故以無生法不可得故離攀緣故不得法忍得無  
所得無得無失是故言得無生法忍復次文殊師利  
彼無生法忍者所謂一切法無生如是忍故一切法  
無來如是忍故一切法無去如是忍故一切法無我  
如是忍故一切法無主如是忍故一切法無取如是  
忍故一切法無捨如是忍故一切法無所有如是忍  
故一切法無實如是忍故一切法無等如是忍故一  
切法無等等如是忍故一切法無比如是忍故一切  
法無染如虛空如是忍故一切法無破壞如是忍故  
一切法無斷如是忍故一切法無垢如是忍故一切  
法無淨如是忍故一切法空如是忍故一切法無相  
如是忍故一切法無願如是忍故一切法離貪恚癡  
如是忍故一切法如如是忍故一切法法性如是

忍故一切法實際如是忍故如是一切法無分別無相應無憶念無戲論無思惟無作無力羸劣虛誑如幻如夢如響如影如鏡像如芭蕉如聚沫如水泡如是忍故所可忍者亦無可忍非法非非法但以名字說斯法耳然彼名字亦不可得本性自離如是言忍信解樂入無惑無疑無驚無怖無動無沒遍滿身已正受而行不得其身亦無住處文殊師利是爲菩薩摩訶薩於諸法中得無生忍乃至不行一切想故爾時文殊師利復白佛言世尊所謂忍者云何爲忍乃至不爲境界所壞故名爲忍時彼善住意天子問文殊師利言大士何等不爲境界所壞文殊師利言天子所謂眼何法壞眼謂彼善色惡色是能壞眼如色壞眼彼聲壞耳乃至法壞意亦如是天子若菩薩眼見色不取相不耽好不分別不思惟不愛不厭知本性空無有念想不爲衆色之所傷敗乃至意法亦如是天子若其六情無著無縛無壞無傷如是菩薩住於法忍住法忍故於一切法無所分別無生不生無漏不漏無善不善無爲不爲不念世法及出世法不分別不思惟是則名爲無生法忍說此法時有六萬三千衆生發阿耨多羅三藐三菩提心一萬二千菩

薩得無生法忍爾時善住意天子復白文殊師利言  
大士云何菩薩摩訶薩發起勝行超越轉增入諸地  
也文殊師利言天子誰於其間能發勝行而言諸地  
有超轉者善住意言大士仁豈不知諸菩薩等所行  
殊勝彼彼轉增乃至超越能滿十地乎文殊師利語  
善住意言不然天子我聞佛說一切諸法猶如幻化  
汝不信耶善住意言大士世尊誠言誰敢不信文殊  
師利言天子如彼幻人及幻豈有勝行超越轉入乃  
至具足十地耶善住意言不也大士文殊師利言如  
是天子若使幻人及幻能有超行轉入者則吾等亦  
當如是超越轉入何以故如世尊說一切諸法皆如  
幻化故無轉入天子是故若說諸地有轉入者卽非  
轉入我亦不言地有轉入所以者何一切諸法無轉  
入故是故法於法中不得轉入所謂色於受中不得  
轉入受於色中不得轉入想於行中不得轉入行於  
想中不得轉入識於色中不得轉入色於識中不得  
轉入天子如是乃至於一切法皆應如是作四句說  
又眼不於耳中轉入耳不於眼中轉入鼻不於舌中  
轉入舌不於鼻中轉入身不於意中轉入意不於身  
中轉入所以者何一切諸法其性各異行自境界頑

癡無知無有覺識亦如草木牆壁瓦石如鏡中像如  
幻如化不可證觸一相無相以是義故一切諸法無  
有超轉不出不入無去無來天子當知若諸菩薩如  
是解知彼一切法無超轉者不復更有諸地分別亦  
無入道無有捨地亦無退轉於彼菩提超轉之中無  
有失滅何以故若人見彼陰界諸入是真實者彼無  
超轉所以者何以一切法性本淨故天子是名菩薩  
超越道地天子譬如幻師化作十種輦輿宮閣卽令  
化人居處其內天子於意云何彼人宮閣有定所不  
善住意言無也大士文殊師利言如是如是天子見  
菩薩地有超轉者其事若此

破二乘相品第七之一

爾時善住意天子復問文殊師利言大士或時有人  
至大士所求出家者大士爾時當云何答云何爲說  
出家度法云何授戒及教持戒文殊師利言天子若  
其有人來至我所求出家者我當教彼如是言曰諸  
善男子汝今不應發出家心汝若不發出家心者我  
當教汝真出家法所以者何天子若求出家則求欲  
界亦求色界求無色界復求世間五欲之樂及求未  
來果報諸事若善男子有所求者彼不證法不證法

故彼則見心是故天子若無所取彼爲證法以證法  
故則不見心不見心故則不出家不出家故則無出  
家心無出家心故彼則不發以不發故則無有生以  
無生故彼則盡苦以盡苦故則畢竟盡畢竟盡故彼  
則無盡以無盡故則不可盡不可盡者則是虛空天  
子我時於彼善男子所作如是教復次天子若復有  
人來詣我所求出家者我復教彼如是言曰諸善男  
子汝今莫發出家之心所以者何彼心無生不可得  
發汝莫爲異而保此心復次天子若更有人來詣我  
所求出家者我復教彼如是言曰諸善男子汝今若  
不斷除鬚髮如是汝則真實出家爾時善住意天子  
復白文殊師利言大士以何義故作如斯說文殊師  
利言天子世尊說法無所斷除善住意復問言何等  
不斷亦復不除文殊師利言天子色法不斷亦不除  
受想行識不斷亦不除天子若復有人作如是念我  
除鬚髮乃爲出家當知彼人則住我相住我相故則  
不見平等又見我故則見衆生見衆生故則見鬚髮  
見鬚髮故生剝除想天子彼若不見有我相者則不  
見他相無他相故則無我慢無我慢故則無吾我無  
吾我故則無分別無分別故則無動搖無動搖故則

無戲論無戲論故則無取捨無取捨故無作不作無斷不斷無離無合無減無增無集無散無思無念無說無言如是則名安住真實善住意言大士實義云何文殊師利言天子所言實者卽是虛空如是虛空得名爲實無起無盡無減無增以是故言虛空爲實性空爲實如如爲實法界爲實實際爲實如是實者則亦不實何以故以彼實中不可得故名爲不實爾時文殊師利語善住意言天子若復有人來詣我所求出家者我當教彼如是言曰諸善男子汝今若能

不取著彼袈裟衣者吾則以汝爲真出家善住意言學戒慧亦爾天子若不得心則不念戒若不念戒則不思慧若不思慧則無復起一切疑惑旣無疑惑則不持戒若不持戒是則名爲直持戒也天子當知彼持戒者則無所欲無所欲故則無退還無退還故彼則清淨彼清淨故則得解脫彼解脫故則得精進彼精進故則無有漏彼無漏故則住正行住正行故則無像貌無像貌故卽是虛空何以故以彼虛空無形相故是故天子若有人能如是學者則爲不學彼無學故則爲真學於何處學謂無處學云何無處謂空平等天子若能正住空平等者是則名爲真住戒學

爾時文殊師利復語善住意天子言天子若人能作如是出家如是受具我當教彼如是言曰諸善男子汝今若能受彼一切三千大千世界篤信檀越供養衆具而能於中不起分別不念報恩是乃名爲清淨持戒善住意言大士以何義故作如斯說文殊師利言天子所謂若人取彼施者受者財物三事故是爲報恩又若見彼是爲報恩若思惟彼是爲報恩若分別彼是爲報恩天子若不見彼不取彼不思惟彼不分別彼者有何可報何以故以從本來畢竟清淨如是報故天子彼若取若見若思惟若分別及念報者是謂凡夫非阿羅漢所以者何是諸凡夫於一切時常行取著思量分別此受彼與彼垢此淨以是分別故有報恩云何報恩謂諸凡夫於生死有取後生身是故於彼欲行報恩天子諸阿羅漢不受後有畢竟不見不思量不分別無有此彼更不受身當於何處而報恩也天子若受彼施當行三淨然後乃受何謂三淨一不見已身卽無施者二不見他人卽無受者三不見財物卽無施事天子如是三淨則畢竟淨如斯淨已復何用報天子以是義故我如是說若受三千大千世界篤信檀越一切衆具不分別不念報者

是名世間真勝福田是真出家是淨持戒爾時文殊師利復語善住意天子言天子我與彼人如是出家如是戒已當復教言諸善男子汝今若能不行阿蘭拏不在聚落不處近不住遠不獨坐不衆居不多言不杜默不乞食不受請不事糞掃衣不受他衣鉢不多食不少欲不多求不知足不樹下不露地不服腐爛藥不受肉與酥善男子汝若能於一切頭陀不起分別如是行者則名具足行頭陀也何以故若以憶念分別行者即是我慢心見諸相天子若如是行則如是念我受糞掃衣我行乞食我住樹下我坐露地大士以何義故復如斯說文殊師利言天子諸佛世尊無有取法凡所宣說不爲取著善住意言不取何等文殊師利言天子謂不取色若常無常乃至不取識若常無常不取眼若常無常乃至不取意若常無常不取色乃至不取法不取貪欲不取瞋恚不取愚癡不取顛倒天子如是乃至一切諸法皆悉不取而亦不捨不合不離天子若取袈裟當知彼即大有見相天子是故我說不以取著袈裟而得清淨及得解脫所以者何天子諸佛世尊大菩提處無有袈裟善住意言大士何法是袈裟文殊師利言天子汝問何

法爲袈裟者貪欲是袈裟瞋恚是袈裟愚癡是袈裟  
因是袈裟諸見是袈裟名色是袈裟妄想是袈裟執  
著是袈裟取相是袈裟語言是袈裟如是乃至戲論  
一切諸法皆是袈裟若知諸法無善不善無思無念  
是名無袈裟若無袈裟則無所有若無所有則無垢  
濁若無垢濁則無障礙無障礙故亦無有作是謂思  
量善住意言大士所言思量思量者以何義故名曰  
思量文殊師利言天子彼思量者於法平等無有增  
減無作不作故言思量天子若能於法不作增減如  
世尊說不應復起想念分別故言思量善住意言何  
等名爲不作增減文殊師利言天子過於平等過平  
等已法不可得所謂過去不可得未來不可得現在  
不可得彼法非如無增減作無吾我作無有人作無  
衆生作無壽命作無有斷作無有常作無有分別陰  
入界作無有分別佛法僧作亦無有念是持戒作是  
破戒作是煩惱作是清淨作是得果作是須陀洹作  
是斯陀含作是阿那含作是阿羅漢作是辟支佛作  
乃至此是空作是無相作是無願作是明解脫作是  
離欲作如是天子此皆爲彼無聞凡夫思量分別說  
斯法耳汝應當知此是最下癡人求欲得法妄想取

著是故如來爲斷彼著而演說是思量分別作不作  
事於是善住意天子讚文殊師利言善哉大士快說  
如是甚深法門爾時世尊亦復讚可文殊師利言善  
哉善哉文殊師利汝今乃能作如是說爾時文殊師  
利復語善住意言天子若復有人來請我所求出家  
者我當教彼作如是言諸善男子汝今若能不受具  
戒如是則名真出家也善住意言大士以何義故作  
如是語文殊師利言天子如世尊說唯有二種受具  
戒法何等爲二一受正平等戒二受邪不等戒是中  
何者邪不等戒謂墮我見墮人見墮衆生見墮壽命

見墮士夫見墮斷見墮常見墮邪見墮憍慢墮貪欲  
墮瞋恚墮愚癡墮欲界墮色界墮無色界墮取著分  
別天子是爲略說墮於一切不善法中隨逐惡知識  
妄取一切法墮不知出要解脫之處天子當知是名  
受邪不等戒也天子是處何者是受正平等戒謂空  
是平等無相是平等無願是平等天子若能如是入  
三解脫門如實覺知不分別不思念於一切法無有  
退轉天子是名受正平等戒也復次天子若貪欲發  
若瞋恚發若愚癡發若愛無明發我見發我見爲根  
本六十二見發三邪行發四顛倒發乃至八邪九惱

十不善業道等發故名受正戒也天子譬如一切種子草木樹林皆依大地而得生長其地平等無心念作如是天子若佛法中正受戒故具足成就天子譬如一切草木種子依大地住而得增長天子當應如是具受正戒所以者何住於戒故道法增長如彼種子戒亦復然又如種子增長得名成就如是住於戒故所有一切助菩提分法出生增長得名成就天子是爲過去未來現在諸佛世尊一切聲聞受正戒也所謂入彼三解脱門一切戲論語言滅處天子當知若能如是受具戒者是名受正非不正也爾時文殊師利復語善住意天子言天子我今更於如是出家如是受具如是教曰諸善男子汝今若能不持禁戒如是則爲真實持也善住意言大士以何義故作如斯說文殊師利言天子一切諸法悉無所取故無可持云何此戒而獨有持天子戒若可持則持三界天子於汝意者以何爲戒善住意言大士若能具足波羅提木义者是名爲戒文殊師利言天子云何名爲波羅提木义善住意言大士所謂持身及以口意三業具足是則名爲波羅提木义也文殊師利言天子於意云何今是現前何處有是身業可作如是過去

未來亦無有作彼皆無作無有像貌可得言有或青  
或黃或赤或白及玻璃色耶善住意言不也大士文  
殊師利言天子彼名何等云何而說善住意言彼名  
無爲實不可說如是乃至意作亦然文殊師利言天  
子於意云何彼無爲者可作有爲乎善住意言不也  
大士文殊師利言天子以是義故我如斯說彼若不  
持名真持戒天子若言增上戒學增上心學增上慧  
學者爲學實際當如是知無所持故言增上戒學無  
所知故言增上心學無所見故言增上慧學如是心  
不分別故不憶念故不生殊異故名最上心學如心  
我行阿蘭拏我服腐爛藥我少欲我知足我行頭陀  
天子若正行者不生如是念所以者何爲彼無有一  
切分別故彼於爾時尚不見我況當計有頭陀功德  
若見有者無有是處天子是故若有如是行頭陀不  
憶念不分別我則說爲真頭陀也何以故天子若斯  
人者拂去貪欲拂去瞋恚拂去愚癡拂去三界拂去  
五陰拂去十二入拂去十八界如是我說爲真頭陀  
何以故以彼頭陀不取不捨不思不念不修不行非  
法非非法是故我說真頭陀也爾時文殊師利復語  
善住意天子言天子我與彼人如是出家如是行已

當復教言諸善男子汝今若能不觀四聖諦不修四念處不修四正勤不修四如意足不修五根不修五力不修七覺分不修八聖道不修三十七助菩提法莫證三解脱門何以故天子彼聖諦者入無生相不可念知不可修證所以者何彼無生中云何言證天子是故我言夫念處者非念非思一切諸法故言念處天子若比丘不住欲界不住色界不住無色界故言比丘不住四念處思修四念處云何思修如彼不思不修故言思修如是次第乃至三十七種助菩提法應如是知天子若彼禪行比丘於一切法悉無所得無所得故不思念不分別不修不證何以故天子彼諸法但有名如三十七助菩提法彼雖有名而不可得唯以分別因緣故生一相無相以如是名故如是說其說亦無故彼雖復名字證知終不可得是則名爲如實覺知三十七種助菩提法時彼善住意天子復白文殊師利言大士所言禪行比丘何等名爲禪行比丘耶文殊師利言天子若彼比丘於一切法但取一行極隨順者所謂無生是爲禪行又復無有少法可取是爲禪行又不取何法所謂不取此世彼世不取三界乃至不取一切諸法如是平等是爲禪

行天子如禪行者乃至無有一法相應無合無散是  
爲禪行爾時彼會大衆多有無量百千衆生咸有疑  
心今此文殊師利所說如是云何得與聖說相應所  
以者何世尊恒說若人能入三解脫門名爲涅槃又  
如佛說若有修行三十七種助菩提法便證涅槃然  
而今者文殊師利更如是說不應修是助菩提行亦  
莫入彼三解脫門將非文殊師利虛妄說耶於是文  
殊師利知諸比丘及以衆會咸皆有疑卽語尊者舍  
利弗言大德汝於今者最可證信世尊說汝智慧第  
一大德汝於何者證離欲法且當證法時豈不見四

諦耶舍利弗言不也豈不修三十七助菩提分法耶  
曰不也豈不入三解脫門耶曰不也大士我於爾時  
乃至無有一法可見可除可修可證可選擇者所以  
者何一切諸法無爲無生無言是空若是空者有何  
可證說此法時衆中有三萬比丘於法漏盡心得解  
脫

大寶積經卷第一百四

校謄

第七紙

十四行轉  
南藏作越

大寶積經卷第一百五

隋沙門達摩笈多譯

善住意天子會第三十六之四

破二乘相品第七之二

爾時善住意天子讚文殊師利言善哉善哉大士仁  
今真是聰辯利智快說如斯甚深空忍文殊師利言  
天子我非如是聰辯利智夫利智者則是一切嬰兒  
凡夫何以故天子一切凡夫是名利智何等利智所  
謂地獄利智畜生利智餓鬼利智閻摩利智乃至三  
界一切利智如是取著相應得言利智所以者何不

冊陽居士賀學易室荆氏共施費刻此  
大寶積經第一百四卷 恩江沙彌可震對  
旣寧唐任登書 進賢萬鍊刻  
萬曆丙申仲夏徑山興聖萬壽禪寺識

知生死煩惱先際故天子是故彼諸凡夫著貪欲利  
著瞋恚利著愚癡利乃至與彼諸見名色取著相應  
故言利智非謂諸佛世尊及聲聞緣覺得忍菩薩有  
斯利智是乃名爲一切凡夫取相利智也於是善住  
意天子復問文殊師利言大士仁今所說欲顯智耶  
文殊師利言不也善住意言欲隨行耶文殊師利言  
不也善住意言欲隨句耶文殊師利言如是如是天  
子我由字句善住意言大士仁今何故如斯說耶文  
殊師利言天子若諸菩薩於一字一句初不移動然  
彼字句義門處所近遠淺深皆如實知謂知空處知  
無相處知無願處知遠離處知無所有處知無生處  
知如如處而於其間無受無作無解無知是故得言  
唯字句耳爾時世尊讚文殊師利言善哉善哉文殊  
師利汝今已得陀羅尼故乃能如是分別說也文殊  
師利白佛言世尊我實不得彼陀羅尼何以故世尊  
若有得是陀羅尼者斯則名爲愚癡凡夫非佛世尊  
及諸菩薩得陀羅尼所以者何世尊彼諸凡夫癡衆  
生等有取著故得陀羅尼取著何等所謂取著我故  
得陀羅尼取著人故得陀羅尼取著壽命故得陀羅  
尼取著丈夫故得陀羅尼取著斷滅故得陀羅尼取

著常恒故得陀羅尼取著貪欲故得陀羅尼取著瞋  
恚故得陀羅尼取著愚癡故得陀羅尼取著無明故  
得陀羅尼取著有愛故得陀羅尼取著身見故得陀  
羅尼取著五陰故得陀羅尼取著十二入故得陀羅  
尼取著十八界故得陀羅尼取著憶念故得陀羅尼  
取著分別故得陀羅尼取著六十二見故得陀羅尼  
如是乃至取著一切諸行故得陀羅尼是故凡夫得  
陀羅尼所以者何若法爲彼愚癡取著是則凡夫所  
得非謂佛得非聲聞得非辟支佛得非菩薩得以是  
義故唯彼凡夫得陀羅尼何以故彼諸凡夫以愚癡

故言有取得非佛世尊及菩薩等爾時善住意天子  
復白文殊師利言大士仁若不得陀羅尼者將無墮  
彼頑鈍位乎文殊師利言如是天子我真頑鈍何以  
故夫頑鈍者謂無所知我所行處不可知故是故一  
切諸佛世尊及諸聲聞緣覺菩薩皆墮頑鈍非諸凡  
夫所以者何一切凡夫在於數中諸餘智人盡入頑  
鈍如須陀洹障礙行故貪欲心行尚墮數中何況愚  
癡諸凡夫等而非數也天子是故得言我爲頑鈍我  
實不得彼陀羅尼何以故乃至一法我無所得故說  
是法時彼大衆中有五百比丘聞此法門不能信受

生大恐怖起誹謗心發惡心已棄捨而去卽自見身  
墮大地獄爾時尊者舍利弗白文殊師利言大士仁  
今且住勿說如此甚深經典所以者何今此會中五  
百比丘聞此法門不能信受生大怖畏起誹謗心卽  
自見身已處地獄文殊師利語舍利弗言舍利弗汝  
今不當妄起分別何以故乃至無有一法墮地獄者  
所以者何一切諸法無所生故汝今云何忽發斯言  
令我休止勿宣是法舍利弗若善男子善女人依止  
我見依止人見依衆生見依壽者見依諸見已雖復  
供養恒沙如來應供正遍覺及比丘僧一切衆具隨  
須奉給如是供養盡其形壽無有休廢若復有人聞  
我所說甚深法門一切世間所不能信謂空無相無  
願無作寬大寂靜無生無滅無我無人無衆生無壽  
命無常苦無我如是諸法聞已誹謗墮於地獄然舍  
利弗卽此善男子善女人得聞如是甚深法已雖墮  
地獄從地獄出速得涅槃繫若善男子善女人雖復供  
養恒沙數如來應供正遍覺以取著我不聞如是甚  
深經法終不解脫速證涅槃爾時世尊讚文殊師利  
言善哉善哉文殊師利如是如是誠如汝言若有得  
聞如是甚深微妙經典與值佛出世等無有異何以

故若有欲證須陀洹果要由此經欲證斯陀舍欲證阿那含及阿羅漢要聞此經所以者何以不著我乃能證法證此法時無有所見無所得故爾時世尊告尊者舍利弗言舍利弗汝當知此五百比丘雖墮地獄後從獄出速證涅槃非彼愚癡凡夫之人沒於見得墮墜疑心供養如來能得解脫舍利弗是諸比丘還復因此乃至解脫速得涅槃非是餘人能速解脫所以者何以不聞此深法門故舍利弗若有善男子善女人得聞如是甚深法門一經於耳雖不信受墮於地獄然速解脫其有墮見入地獄者未能解脫

破凡夫相品第八

爾時善住意天子復白文殊師利言大士仁今許我修梵行乎文殊師利言如是天子汝今若能不念作求不思進趣如是吾將許汝梵行善住意言大士以何義故如斯說耶文殊師利言天子若有爲作可名梵行若無爲作何名梵行又復天子若有見得可名梵行若無見得何名梵行善住意言大士仁今寧當無梵行耶文殊師利言如是如是天子我無梵行所以者何夫梵行者則非梵行非梵行故名梵行時善住意天子讚文殊師利言善哉善哉大士仁以具

足樂說辯才能作如是無障礙說文殊師利言天子若吾具足無礙辯者卽成障礙何以故凡是取著我及我所皆由分別一切分別無非障礙故爾時文殊師利復語善住意天子言天子汝今若能斷除一切衆生命根然不執刀不持杖不把棊不捉塊而行事者吾當同汝修於梵行善住意言大士復以何義如斯說耶文殊師利言天子言衆生者於意云何善住意言大士我言衆生衆生者乃至一切但有名字皆想取故文殊師利言天子是故我言汝今當須殺害我想殺害人想殺衆生想殺壽命想乃至滅除名字

等想如斯殺也善住意言大士當以何殺具而行殺乎文殊師利言天子吾常用彼利智慧刀而行殺害當行殺時彼利智刀應如是執當如是害然亦無有執持之想及以害想天子以是義故汝當善知殺害我想及衆生想是名真殺一切衆生如是吾當許汝梵行爾時文殊師利復語善住意天子言天子我復語汝汝若修行十惡業道復能成就黑濁垢法放捐一切十善業道破壞離散清白法者我當共汝修於梵行善住意言大士以何義故復如是說文殊師利言天子所有一切染濁清白皆悉平等彼平等者我

得如此同汝梵行天子於意云何汝以何法爲染濁  
平等善住意言以不貪不作不退不墮是謂染濁平  
等文殊師利言天子復以何法爲白淨平等善住意  
言以如法性及與實際三解脱門是謂白淨平等文  
殊師利言天子吾卽令汝眞法界中具足修行周旋  
往返其事可乎善住意言不也大士文殊師利言天  
子以是義故我作斯說染濁清白一切等者然後方  
可共修梵行爾時文殊師利復語善住意天子言天  
子汝今若能取應死人手執利刀斬其頭者吾當許  
汝如是梵行善住意言大士以何義故復作此說文  
殊師利言天子可殺者誰何者是頭誰能行殺天子  
汝今當知須殺貪欲須殺瞋恚須殺愚癡如是乃至  
我慢嫉妬欺誑諂曲執著取相及受想等天子是爲  
可殺天子若人一心專精自守貪欲心發卽應覺知  
方便散除還令寂靜云何散除應作是念此是空此  
不淨求此欲心生處滅處從何所來去至何所是中  
誰染誰受染者誰爲染法如是觀時不見能染不見  
所染不見染事以不見故則無有取以不取故則無  
有捨以不捨故則無有受不捨不受則名離欲寂滅  
涅槃如是乃至一切受心亦如是說天子當知如是

殺法卽殺卽生是故得言彼行殺時先斬其頭是爲  
真殺以是義故我如此說爾時文殊師利復語善住  
意天子言天子汝今若能違背諸佛毀謗法僧吾將  
同汝如是梵行善住意言大士仁今何故復如是說  
文殊師利言天子如汝意者以何爲佛善住意言大  
士如如法界我言是佛文殊師利言天子於意云何  
如如法界可染著乎善住意言不也大士文殊師利  
言天子以是義故我如是說汝今若能毀謗諸佛吾  
將同汝如是梵行文殊師利言天子如汝意者以何  
爲法善住意言大士離欲寂靜我名爲法文殊師利  
言天子於意云何彼寂靜法可染著乎善住意言不  
也大士文殊師利言如是天子以此義故我如是說  
汝今若能毀謗正法吾將同汝如是梵行文殊師利  
言天子如汝意者以何爲僧善住意言大士無爲法  
者是名聖僧如世尊說一切聖人以無爲得名故無  
爲法名聲聞僧文殊師利言天子於意云何是無爲  
法可執著乎善住意言不也大士文殊師利言如是  
天子以此義故我如是說汝今若能破壞聖僧吾將  
同汝如是梵行文殊師利言天子若人見佛彼則著  
佛若人見法彼則著法若人見僧彼則著僧何以故

以佛法僧非可得故天子若人不見佛不聞法不識  
僧者彼爲不背佛不謗法不破僧何以故以其不得  
佛法僧故天子若人愛佛愛法愛僧彼爲染著佛法  
及僧天子當知若人不著佛法僧者是則名爲離欲  
寂滅天子以此義故我如是說汝今若能於佛法僧  
不染著者我則同汝如是梵行爾時善住意天子復  
白文殊師利言大士希有希有今日乃能宣說如是  
甚深義處我於大士以何報恩文殊師利言天子汝  
莫報恩善住意言大士我今云何得不報也文殊師  
利言天子汝莫報恩所以者何天子汝能如是不報  
恩者卽爲報也善住意言大士仁今寧可無報恩乎  
文殊師利言天子如是如是我報恩亦非不報善  
住意言大士仁以何義更作是說文殊師利言天子  
凡愚之人造種種法起種種見行種種行以作如是  
種種見行是故念言我當報恩天子此非正行善男  
子也其有正行善男子者乃至無有少作或作不作  
彼終不言我念報恩又復天子不報恩者如佛世尊  
宣說平等謂一切法悉無所作無有作處皆入平等  
無有轉還亦無超越非自非他無作不作是故我爲  
無報恩也爾時善住意天子復白文殊師利言大士

仁住何處作如是說住忍說乎住法說也文殊師利  
言天子我所住者非忍非法善住意言大士實住何  
處故如是說文殊師利言天子我無所住如化人身  
我如是住善住意言大士彼化人者復依何住文殊  
師利言天子如如住化如是住天子若如是者汝  
云何言住住何處爲忍爲法如斯問也天子是故我  
所言忍但有其名無住處法亦如是無有住處無  
有動轉亦無分別天子當知一切諸法悉無住處而  
言住者是謂如來爲諸衆生作如是說所以者何如  
佛所說如來住彼如如法中一切衆生亦復如是住  
於如如初不移動如衆生如卽如來如如來如卽衆  
生如衆生如來無二無別爾時善住意天子復白文  
殊師利言大士所言沙門那沙門那者義何謂也文  
殊師利言天子若非沙門非婆羅門是則名爲真沙  
門也所以者何以彼不著欲界不著色界不著無色  
界是故我言真沙門也天子若眼不漏耳不漏鼻不  
漏舌不漏身不漏意不漏者我復說爲真沙門也天  
子若不依止說不依止證不依止處者我復說爲真  
沙門也天子若無去處無來處無傷無瘡者我復說  
爲真沙門也天子是以彼句非沙門非婆羅門我乃

說爲真沙門也爾時善住意天子讚文殊師利言善哉善哉大士實未曾有仁者志若金剛其所宣說無有章句亦無處所心咸了達無所遺餘文殊師利言天子我心不剛所以者何吾自放意心安柔忍是故不剛善住意言大士是義云何文殊師利言天子吾以恣心入聲聞地處緣覺境是謂放心吾又恣心入諸塵勞生死之內而亦不惡貪恚癡等煩惱過患是謂放心時善住意天子復讚文殊師利言善哉善哉希有大士仁由過去久供諸佛植衆德本故能宣說妙若斯也文殊師利言天子吾無供佛不植善根所以者何吾初不見宿昔所更又亦不知當來所作雖有所作亦無有作於諸佛法未曾建立云何能有植衆德本

神通證說品第九

爾時善住意天子復白文殊師利言大士我昔曾聞如幻三昧惟願垂慈顯此正受文殊師利言天子汝欲見聞如幻三昧甚深境界乎善住意言大士我誠願見時文殊師利如言卽入如幻三昧應時十方如恒沙等諸佛國土一切境界自然現前於是善住意天子悉見東方恒沙佛土其中所有種種衆事或見

比丘稱揚宣說如是經典或見比丘尼像或見優婆塞優婆夷像或見大梵天王天帝釋四天王或見人間轉輪聖王或見一切天龍夜叉乾闥婆阿脩羅迦樓羅緊那羅摩睺羅伽乃至或見一切鳥獸種類若干形貌好醜皆爲說法如此東方南西北方四維上下一切十方咸有如是恒河沙等諸佛國土所有事業亦皆如是等無有異盡是文殊師利威神力也時善住意天子既見如是十方佛土一切境界歡喜踊躍不能自持於是文殊師利從三昧起善住意天子一心敬仰白文殊師利言大士向見十方諸佛國土無量境界佛事亦殊而各宣說如斯經典爾時文殊師利問善住意天子言天子於意云何汝向所見東方所有一切境界可謂實乎善住意言不也大士文殊師利言如此東方及餘九方如是十方所有境界復爲實乎善住意言大士一切皆虛無有實也所以者何一切諸法本無有生其猶幻化欺誑世間一切諸法轉變推移無常存者皆是虛妄顯現所爲窮其體實了不可得不得生不起不滅於是文殊師利讚善住意言善哉善哉天子誠如汝言爾時會有五百菩薩已得四禪成就五通然是菩薩依禪坐

起雖未得法忍亦不誹謗時諸菩薩宿命通故自見  
往昔所行惡業或殺父殺母殺阿羅漢或毀佛寺破  
塔壞僧彼等明見如是餘業深生憂悔常不離心於  
甚深法不能證入我心分別彼罪未忘是故不能獲  
深法忍爾時世尊爲欲除彼五百菩薩分別心故卽  
以威神覺悟文殊師利文殊師利承佛神力從座而  
起整理衣服偏袒右膊手執利劍直趨世尊欲行逆  
害時佛遽告文殊師利言汝住汝住不應造逆勿得  
害我我必被害爲善被害何以故文殊師利從本已  
來無我無人無有丈夫但是內心見有我人內心起

時彼已害我卽名爲害時諸菩薩聞佛說已咸作是  
念一切諸法悉如幻化是中無我無人無衆生無壽  
命無丈夫無摩奴闍無摩那婆無父無母無阿羅漢  
無佛無法無僧無有是逆無作逆者豈有墮逆所以  
者何今此文殊師利聰明聖達智慧超倫諸佛世尊  
稱讚此等已得無礙甚深法忍已曾供養無量百千  
億那由他諸佛世尊於諸佛法巧分別知能說如是  
真實之法於諸如來等念恭敬而忽提劍欲逼如來  
世尊遽告且住且住文殊師利汝無害我若必害者  
應當善言所以者何是中若有一法和合集聚決定

成就得名爲佛名法名僧名父名母名阿羅漢定可  
取者則不應盡然而今此一切諸法無體無實非有  
非真虛妄顛倒空如幻化是故於中無人得罪無罪  
可得誰爲殺者而復受殃彼諸菩薩如是觀察明了  
知已卽時獲得無生法忍歡喜踊躍身昇虛空高七  
多羅樹以偈歎曰

|       |       |       |
|-------|-------|-------|
| 諸法如幻化 | 斯由分別起 | 是中無所有 |
| 一切法皆空 | 顛倒虛妄想 | 愚癡取我心 |
| 計念我昔愆 | 所作業中甚 | 過去爲大逆 |
| 殺父母良田 | 殺羅漢比丘 | 是爲極重惡 |

|       |       |       |
|-------|-------|-------|
| 以彼惡業故 | 我當受大苦 | 沒疑網衆生 |
| 聞法悔惑除 | 大名拔我毒 | 破散我疑心 |
| 我已覺法界 | 衆惡無所有 | 諸佛巧方便 |
| 善知我等意 | 方便度衆生 | 爲解諸疑縛 |
| 何處有諸佛 | 法僧亦復然 | 父母本自無 |
| 阿羅漢空寂 | 是處無有殺 | 云何有業果 |
| 如幻無所生 | 諸法性如是 | 文殊大智人 |
| 深達法源底 | 自手握利劍 | 馳逼如來身 |
| 如劍佛亦爾 | 一相無有二 | 無相無所生 |
| 是中云何殺 |       |       |

說此執劔妙法門時十方如恒沙等諸佛世界六種震動時彼十方諸佛世界一切諸佛現前說法彼佛侍者各於本國大衆會中從座而起咸請其佛言世尊今此神變是誰威德而令世間大地震動時十方諸佛各各告其弟子曰諸善男子今有世界名曰娑婆彼土有佛號釋迦牟尼如來應供正遍覺現在說法然彼世界有一上首菩薩摩訶薩名文殊師利久已不退於阿耨多羅三藐三菩提爲欲破壞新學菩薩執著心故躬秉利劔馳走趣彼釋迦如來顯發深法以是因緣故令大地如是震動彼佛世尊因智劔

故說甚深法得令無量無邊阿僧祇衆生法眼清淨心得解脫證深法忍安住菩提爾時世尊建立如是大神變時以方便力令彼衆中一切諸來新學菩薩善根微少未離分別取相衆生皆悉不覩彼執劔事亦不得聞其所說法爾時尊者舍利弗白文殊師利言大士仁今已造極猛惡業欲害如是天人大師是業若孰當於何受時文殊師利告舍利弗言如是大德如汝所說我今唯能造作如是極重惡業而實不知於何處受然舍利弗如吾見者當若化人幻業孰時我如斯受所以者何彼幻化人無心分別無有念

想一切諸法皆幻化故又舍利弗我今問汝隨汝意  
答於意云何如汝意者實見劍耶舍利弗言不也文  
殊師利曰又定見彼惡業可得耶舍利弗言不也文  
殊師利曰又定見彼受果報耶舍利弗言不也文殊  
師利言如是舍利弗彼劍旣無復無業報誰造斯業  
誰受報者而反問我受報處乎舍利弗言大士以何  
義故復如是說文殊師利言如我所見實無有法業  
報熟者所以者何一切諸法無業無報無業報熟故  
爾時十方世界諸來菩薩摩訶薩等同請佛言世尊  
惟願世尊以威德力如是文殊師利令至十方諸佛

世界說如斯法令彼衆生咸得聽聞如我無異於是  
文殊師利菩薩摩訶薩語彼十方諸菩薩言諸善男  
子汝今宜各一心觀察自佛世界也時彼十方諸菩  
薩衆從文殊師利聞是語已卽各觀本自佛世界皆  
覩文殊師利處其佛前爲諸大衆說如斯法復各見  
彼皆有善住意天子問是法門又各見彼十方佛國  
諸菩薩等悉皆大集又皆見彼諸天子衆其數多少  
與此弗殊又各見彼佛界清淨莊嚴微妙與此無異  
彼諸菩薩摩訶薩衆如是見已生殊特心得未曾有  
同聲讚言甚竒甚特今此文殊師利道德巍巍處斯

世界安住不動而能普現十方佛前爾時文殊師利告彼十方菩薩衆言諸善男子汝今當聽譬如幻師既善學已不離本座而能幻作種種色像菩薩摩訶薩亦復如是既能善學般若波羅蜜如幻法已卽於一切如幻法中隨其十方諸佛國土欲現形像作諸佛事如意卽能所以者何一切諸法皆如幻化以是義故所作隨心譬如日月宮輪住虛空處初不曾下入諸器中其光普照靡不周遍菩薩如是安住不動隨心普現十方佛前或現聲聞緣覺等身或現梵王帝釋等像或現四天轉輪王事或現國主大臣政化如是乃至示現一切惡趣衆生形類隨意卽能而亦初無興作之想

稱讚付法品第十

爾時世尊告文殊師利言文殊師利若有得聞此修多羅甚深法門與值佛典世等無有異文殊師利若聞此經與證須陀洹無異與證斯陀含無異與證阿那含無異與證阿羅漢無異何以故以彼如如無異故文殊師利又若聞此經心生信解與彼後身菩薩菩提樹下坐於道場必成正覺一等無異何以故如斯法門卽是三世諸佛世尊之要道故於是文殊師

利白佛言世尊如是如是如佛所說如空無異如無相無異如無願無異如如無異如法界無異如實際無異如平等無異如解脫無異如離欲無異爾時文殊師利白佛言世尊惟願如來護持如是甚深法門於後末世五百歲時當使此經於閻浮提遍行流布令諸善男子善女人等咸得聞之文殊師利作是請時卽令三千大千世界一切音樂不鼓自鳴一切諸樹自然鬱茂一切衆華咸悉開敷又此三千大千世界六反震動放大光明遍照三千大千世界奪日月光令不復現百千億天歡喜踊躍得未曾有住於虛空雨天華香種種諸華及諸華鬘塗香末香如雨而下香氣馥充滿十方作天樂音其聲和雅一切咸共叉手合掌同聲稱讚希有希有奇特法門今此文殊師利大士所說令我等聞我爲福會從生至今再遇閻浮轉大法輪有諸衆生具足善根然後乃得聞此深法若諸衆生聞已信行當知是人已曾供養一切諸佛亦爲已得甚深法忍若有衆生聞此經典不驚不怖不退不沒深心愛樂當知是人不經二乘善根中來爾時文殊師利白佛言世尊今此竒瑞將無爲是法門於未來世閻浮提中遍行流布住持不

經  
大智度論卷第二十五

滅耶佛言如是如是向所現瑞唯爲是經於閻浮提  
遍行流布住持不滅故文殊師利言世尊惟願世尊  
更建誠實今此經典從世流行熾然不滅佛言文殊  
師利若三解脱門能證涅槃是誠實者於後末世五  
百歲時此經法門弘闡浮提熾然不滅爲誠實語文  
殊師利若苦無常若空無我是實言者於後末世五  
百歲時此經法門弘闡浮提熾然不滅爲誠實語文  
殊師利言世尊如世尊說無我無人無衆生無壽命  
無丈夫無摩奴闍無摩那婆無煩惱無清淨是實言  
者於後末世五百歲時此經法門弘闡浮提熾然不

滅是誠實語如世尊說無生死無涅槃無貪欲無瞋  
恚無愚癡無名無色無因無果無有無知無身無身  
證無心無心果無念無念處無發無發處無色無受  
無想無行無識無眼無色無耳無聲無鼻無香無舌  
無味無身無觸無意無法無欲界無色界無無色界  
無斷無常如是等法是實言者於後末世五百歲時  
此經法門弘闡浮提熾然不滅是誠實語如世尊說  
無須陀洹無須陀洹果無斯陀含無斯陀含果無阿  
那含無阿那含果無阿羅漢無阿羅漢諸法無辟支  
佛無辟支佛諸法無如來無如來諸法無證果等無

力無畏無智果無聖證無空無無相無無願無離欲  
處無得本性無有平等無有證處無暗無明無縛無  
解無彼岸無此岸無中間無念無覺如此等法是實  
言者於後末世五百歲時此經法門弘闡浮提遍行  
流布熾然不滅是誠實語如世尊說於諸法門無有  
衆生信解脫得果相應不相應不合不散如是等法  
爲實言者於後末世五百歲時此經法門弘闡浮提  
遍行流布熾然不滅是真實語如世尊說過去諸如  
來應供正遍覺作如斯說無有一法能令衆生於生  
死中滅除煩惱解脫涅槃亦無衆生有法生滅乃至

無有過失無出無動如過去佛所說如是未來現在  
所說亦然若此等法是實言者於後末世五百歲時  
此經法門弘闡浮提遍行流布是真實語又如世尊  
說此法時無有菩薩得是三昧諸陀羅尼門亦復無  
彼諸佛所說語言句義乃至不說一文字句無人聽  
聞無人得解無人成佛如此等法是實言者於後末  
世五百歲時此經法門弘闡浮提遍行流布熾然不  
滅是真實語如世尊說無有戒身無有三昧無有智  
慧無有解脫無有解脫知見如此等法是實言者於  
後末世五百歲時此經法門弘闡浮提普宣流布熾

然不滅是真實語如世尊說諸菩薩等不行布施不持禁戒不修忍辱不發精進不入禪定不得般若不求菩提不轉諸地不得佛道不得諸力不得無畏不得諸相不獲諸辯不轉法輪不度衆生令取正覺如此等法是實言者於後末世五百歲時此經法門弘闡浮提普宣流布熾然不滅爲真實語文殊師利宣此誠實誓時三千大千世界大地六種震動爾時彌勒菩薩摩訶薩白佛言世尊有何因緣今此世界如是大動佛告彌勒菩薩言彌勒汝今不應問如是事所以者何末世衆生鈍根少信聞不能解墮於疑慢

長夜不安於是彌勒菩薩復白佛言世尊惟願說之世尊若說能多利益一切世間天人大衆故佛告彌勒如是經典往昔已有七十四億百千那由他諸佛世尊於此方所稱揚讚說皆因文殊師利及善住意天子等問答諮論也彌勒菩薩復白佛言世尊是文殊師利及善住意天子聞此法門其久逮耶佛告彌勒乃往過七阿僧祇劫有佛世尊號普華最上師子遊步勝功德聚如來應供正遍覺所是善男子等從彼佛所初聞此經也說是經時衆中有若干恒河沙衆生皆發阿耨多羅三藐三菩提心復倍前數衆生

得住不退轉忍復倍前數衆生遠塵離垢得法眼淨  
爾時世尊說此經已於是文殊師利與善住意天子  
及彼十方諸菩薩衆及彼一切諸天子衆及尊者舍  
利弗尊者摩訶迦葉諸比丘衆乃至所有天人阿脩  
羅諸龍鬼神一切衆等聞佛所說皆大歡喜信受奉  
行

大寶積經卷第一百五

校譌 第十五紙一行得宋藏作復 第十五紙二十行如宋南藏作加

音釋

梜步項切殺施智切髀伯各切遽共據切踊躍

踊尹竦切躍弋灼切氛馥馥數文切馥方六切氛馥郁也



卅陽居士賀懋勳懋美懋庶懋謙普燈共施刻  
大寶積經第一百五卷 叙卅沙彌性淨對  
旣寧唐士登書 上元許一科刻  
萬曆丙申孟夏徑山典聖萬壽禪寺識



三井